

宋

史

二

蘇軾詩集

本紀卷第一

宋史一

開府儀同三司柱國錄軍國事兼宰相監修國史領經筵事攝總樞密等事  
勅修

太祖一

太祖啓運立極英武睿文神德聖功至明大孝皇帝  
諱匡胤姓趙氏涿郡人也高祖朮是為僖祖仕唐歷  
永清文安幽都令朮生珽是為順祖歷藩鎮從事累  
官兼御史中丞珽生敬是為翼祖歷營薊涿三州刺  
史敬生弘殷是為宣祖周顯德中宣祖貴贈敬左驍  
騎衛上將軍宣祖少驍勇善騎射事趙王王鎔為鎔

將五百騎援唐莊宗于河上有功莊宗愛其勇留典禁軍漢乾祐中討王景於鳳翔會蜀兵來援戰于陳倉始合矢集左目氣彌盛奮擊大敗之以功遷護聖都指揮使周廣順末改鐵騎第一軍都指揮使轉右廂都指揮領岳州防禦使從征淮南前軍却吳人來乘宣祖邀擊敗之顯德三年督軍平揚州與世宗會壽春壽春賣餅家餅薄小世宗怒執十餘輩將誅之宣祖固諫得釋累官檢校司徒天水縣男與太祖分典禁兵一時榮之卒贈武清軍節度使太尉太祖宣祖仲子也母杜氏後唐天成二年生於洛陽夾馬營

赤光繞室異香經宿不散體有金色三日不變既長  
容貌雄偉器度豁如識者知其非常人學騎射輒出  
人上嘗試惡馬不施銜勒馬逸上城斜道額觸門楣  
墜地人以為首必碎太祖徐起更追馬騰上一無所  
傷又嘗與韓令坤博土室中雀鬪戶外因競起掩雀  
而室隨壞漢初漫遊無所遇舍襄陽僧寺有老僧善  
術數顧曰吾厚贖汝北往則有遇矣會周祖以樞密  
使征李守真應募居帳下廣順初補東西班行首拜  
滑州副指揮世宗尹京轉開封府馬直軍使世宗即位  
復典禁兵北漢來寇世宗率師禦之戰于高平將



合指揮樊愛能等先遁軍危太祖麾同列馳馬衝其鋒漢兵大潰乘勝攻河東城焚其門左臂中流矢世宗止之還拜殿前都虞候領嚴州刺史三年春從征淮南首敗萬衆于渦口斬兵馬何延錫等南唐節度皇甫暉姚鳳衆號十五萬塞清流關擊走之追至城下暉曰人各為其主願成列以決勝負太祖笑而許之暉整陣出太祖擁馬項直入手刃暉中腦并姚鳳禽之宣祖率兵夜半至城下傳呼開門太祖曰父子固親啓閉王事也詰旦乃得入韓令坤平揚州南唐來援令坤議退世宗命太祖率兵二千趨六合太祖

下令曰揚州兵敢有過六合者斷其足令坤始固守  
太祖尋敗齊王景達于六合東斬首萬餘級還拜殿  
前都指揮使尋拜定國軍節度使四年春從征壽春  
拔連珠砦遂下壽州還拜義成軍節度檢校太保仍  
殿前都指揮使冬從征濠泗為前鋒時南唐砦于十  
八里灘世宗方議以橐駝濟師而太祖獨躍馬截流  
先渡麾下騎隨之遂破其砦因其戰艦乘勝攻泗州  
下之南唐屯清口太祖從世宗翼淮東下夜追至山  
陽俘唐節度使陳承昭以獻遂拔楚州進破唐人于  
盩江口直抵南岸焚其營柵又破之于瓜步淮南平

唐主畏太祖威名用間於世宗遣使遺太祖書餽白金三千兩太祖悉輸之內府間乃不行五年改忠武軍節度使六年世宗北征為水陸都部署及莫州先至瓦橋關降其守將姚內斌戰却數千騎關南平世宗在道閱四方文書得韋囊中有水三尺餘題云點檢作天子異之時張永德為點檢世宗不豫還京師拜太祖檢校太傅殿前都點檢以代永德恭帝即位改歸德軍節度檢校太尉七年春北漢結契丹入寇命出師禦之次陳橋驛軍中知星者苗訓引門吏楚昭輔視日下復有一日黑光摩盪者久之夜五鼓軍士

集驛門宣言策點檢為天子或止之衆不聽遲明逼  
寢所太宗入白太祖起諸校露刃列于庭曰諸軍無  
主願策太尉為天子未及對有以黃衣加太祖身衆  
皆羅拜呼萬歲即掖太祖乘馬太祖攬轡謂諸將曰  
我有號令爾能從乎皆下馬曰唯命太祖曰太后主  
上吾皆北面事之汝輩不得驚犯大臣皆我比肩不  
得侵凌朝廷府庫士庶之家不得侵掠用令有重賞  
違即孥戮汝諸將皆載拜肅隊以入副都指揮使韓  
通謀禦之王彥昇遽殺通於其第太祖進登明德門  
令甲士歸營乃退居公署有頃諸將擁宰相范質等

至太祖見之嗚咽流涕曰違負天地今至于此質等未及對列校羅彥瓌按劍厲聲謂質等曰我輩無主今日須得天子質等相顧計無從出乃降階列拜召文武百僚至晡班定翰林承旨陶穀出周恭帝禪位制書于袖中宣徽使引太祖就庭北面拜受已乃掖太祖升崇元殿服袞冕即皇帝位遷恭帝及符后于西宮易其帝號曰鄭王而尊符后為周太后

建隆元年春正月乙巳大赦改元定有天下之號曰宋賜內外百官軍士爵賞貶降者叙復流配者釋放父母該恩者封贈遣使徧告郡國丙午詔諭諸鎮將

帥戊申賜書南唐贈韓通中書令命以禮收葬己酉  
遣官告祭天地社稷復安州華州兗州為節度辛亥  
論翊戴功以周義成軍節度使殿前都指揮使石守  
信為歸德軍節度使侍衛親軍馬步軍副都指揮使  
江寧軍節度使侍衛親軍馬軍都指揮使高懷德為  
義成軍節度使殿前副都點檢武信軍節度使侍衛  
親軍步軍都指揮使張令鐸為鎮安軍節度使侍衛  
親軍馬步軍都虞候殿前都虞候王審琦為泰寧軍  
節度使殿前都指揮使虎捷右廂都虞候張光翰為  
江寧軍節度使侍衛親軍馬軍都指揮使龍捷右廂

都指揮使趙彥徽為武信軍節度使。餘領軍者並進爵壬子。賜宰相樞密諸軍校襲衣犀玉帶鞍馬有差。癸丑。放南唐降將周成等歸國。乙卯。遣使分振諸州。丁巳。命周宗正郭玘祀周陵廟。仍以時祭享。己未。宰相表請以二月十六日為長春節。癸亥。以周天雄軍節度使魏王符彥卿守太師。雄武軍節度使王景守太保。太原郡王定難軍節度使守太傅。西平王李彝殷守太尉。荆南節度使高保融守太傅。餘領節鎮者並進爵。甲子。賜皇弟殿前都虞候匡義名光義。己巳。立太廟。鎮州郭崇報契丹與北漢軍皆遁。二月乙

亥尊母南陽郡夫人杜氏為皇太后以周宰相范質  
依前守司徒兼侍中王溥守司空兼門下侍郎同中  
書門下平章事魏仁浦為尚書右僕射兼中書侍郎  
同中書門下平章事樞密使吳廷祚同中書門下二  
品丙戌長春節賜群臣衣各一襲三月乙巳改天下  
郡縣之犯御名廟諱者丙辰南唐主李景吳越王錢  
俶遣使以御服錦綺金帛來賀宿州火遣使恤災壬  
戌定國運以火德王色尚赤臘用戌癸亥命武勝軍  
節度使宋延渥等率舟師巡江徼是春均房商洛鼠  
食苗夏四月癸酉寶儼上二舞十二樂曲名樂章乙



酉辛王津園遣使分詣京城門賜饑民粥丙戌浚蔡  
河癸巳昭義軍節度使李筠叛遣歸德軍節度使石  
守信討之五月己亥朔日有食之庚子遣昭化軍節  
度使慕容延釗彰德軍節度使王全斌將兵出東道  
與守信會討李筠壬寅寶嚴上太廟舞曲名癸卯石  
守信敗李筠于長平甲辰命諸道進討丙午幸魏仁  
浦第視疾己酉西京作周六廟成遣官奉遷丁巳詔  
親征以樞密使吳玠祚留守上大都虞候光義為大  
內都點檢命天平軍節度使韓令坤屯兵河陽己未  
發京師丁卯石守信高懷德破筠衆于澤州禽偽節

度范守圖殺北漢援兵之降者數千人筠遁入澤州  
戊辰王師圍之六月癸酉有星赤色出心辛未拔澤  
州筠赴火死命埋齒骼釋河東相魏融禁剽掠甲申  
免澤州今年租有星赤色出太微垣厯上相乙酉伐  
上黨丁亥筠子守節以城降赦之上如潞辛卯大赦  
減死罪免附潞三十里今年租錄陣歿將校子孫丁  
夫給復三年甲午永安軍節度使折德展破北漢沙  
谷砦秋七月戊申上至自潞壬子幸范質第視疾甲  
子遣工部侍郎艾穎拜嵩慶陵乙丑南唐進白金賀  
平澤潞丁卯南唐進乘輿御服物八月戊辰朔御崇

元殿行入閣儀辛未遣郭玘饗周廟壬申復貝州為  
求清軍節度甲戌命宰相禱雨辛巳以周武勝軍節  
度使侯章為太子太師壬午以光義領泰寧軍節度  
依前殿前都虞候甲申立琅琊郡夫人王氏為皇后  
戊子南唐進賀平澤潞金銀器羅綺以千計九月壬  
寅昭義軍節度使李繼勳焚北漢平遙縣癸卯三佛  
齊國遣使貢方物丙午奉玉冊謚高祖曰文獻皇帝  
廟號僖祖高祖妣崔氏曰文懿皇后曾祖曰惠元皇  
帝廟號順祖曾祖妣桑氏曰惠明皇后祖曰簡恭皇  
帝廟號翼祖祖妣劉氏曰簡穆皇后皇考曰武昭皇帝

廟號宣祖己酉幸宜春苑中書舍人趙行逢坐從征  
避難貶房州司戶參軍己未淮南節度李重進以揚  
州叛遣石守信等討之甲子歸太原俘冬十月丁卯  
朔賜内外文武官冬衣有差壬申定縣為望緊上中  
下令三年一注壬午河決厭次乙酉晉州兵馬鈐轄  
荆罕儒襲北漢汾州死之龍捷指揮石進二十九人  
坐不救棄市丁亥詔親征揚州以都虞候光義為大  
內都部署樞密使吳廷祚權上都留守戊子詔諸道  
長貳有異政衆舉留請立碑者委參軍驗實以聞庚  
寅發京師十一月丁未師傳揚州城拔之重進盡室

自焚戊申誅重進黨揚州平命諸軍習戰艦于迎鑾  
南唐主懼甚其臣杜著薛良因詭迹來奔帝疾其不  
忠斬著下蜀市配良廬州牙校己酉振揚州城中民  
人米一斛十歲以下者半之脅隸為軍者賜衣履遣  
還庚戌給攻城役夫死者人絹三匹復三年乙卯南  
唐主遣使來犒師庚申遣其子從鑑來朝十二月己  
巳駕還丁亥上至自揚辛卯泉州節度使留從效稱  
藩

二年春正月丙申朔上詣太后宮門稱慶庚子占城  
國王遣使來朝壬寅幸造船務觀習水戰戊申以揚

州行宮為建隆寺太僕少卿王承哲坐舉官失實責授殿中丞壬子商州鼠食苗詔免賦謂宰臣曰比命使度田多邀功弊民當慎其選以見朕意丁巳導蔡水入潁己未遣郭玘饗周廟靈武節度使馮繼業獻馬五百橐駝百野馬二甲子澤州刺史張崇詒坐黨李重進棄市二月丙寅幸飛山閣閱礮車壬申疏五丈河癸酉有司奏進士合格者十一人荆南高保勗進黃金什器甲戌幸城南觀脩水匱丁丑南唐進長春節御衣金帶及金銀器己卯賜天雄軍節度符彥卿粟禁春夏捕魚射鳥己丑定竊盜律三月丙申內

酒坊火酒工死者三十餘人乘火為盜者五十人擒斬三十八人餘以宰臣諫獲免酒坊使左承規副使田處巖以酒工為盜坐棄市閏月己巳幸玉津園謂侍臣曰沉湎非令儀朕宴偶醉恒悔之壬辰南唐進謝賜生辰金器羅綺丁丑金商房三州饑振之癸未幸迎春苑宴射夏四月癸巳朔日有食之壬寅詔郡國置前代帝王賢臣陵冢戶已酉無棣男子趙遇詐稱皇弟伏誅己未商河縣令李瑤坐贓杖死左贊善大夫申文緯坐失覺察除籍庚申班私鍊貨易監及貨造酒麴律五月癸亥朔以皇太后疾赦雜犯死罪

己下乙丑天狗墮西南丙寅三佛齊國來獻方物丁丑以安邑解兩池鹽給徐宿鄆濟庚寅供奉官李繼昭坐盜賣官船棄市詔諸道郵傳以軍卒遞六月甲午皇太后崩于滋德殿己亥群臣請聽政從之庚子以太后喪權停時享辛丑見百官於紫宸殿門壬子祈雨庚申釋服秋七月壬戌以皇太后殯不受朝辛未晉州神山縣谷水泛出鐵方圓二丈三尺重七千斤壬申以光義為開封府尹光美行興元尹己卯隴州進黃鸝鷁八月壬辰朔不視朝壬寅詔諸大辟送所屬州軍決判甲辰南唐主李景死子煜嗣遣使請



追尊帝號從之己酉執易定節度使同平章事孫行友削官勒歸私第辛亥幸崇夏寺觀脩三門女直國遣使來朝獻大名府永濟主簿郭顥坐贓棄市庚申周世宗實錄成九月壬戌朔不御殿南唐遣使來進金銀繒綵甲子契丹解利來降荆南節度使高保勗遣其弟保寅來朝戊子遣使南唐賻祭冬十月癸巳南唐遣其臣韓熙載田霖來會皇太后葬丙申遣樞密承旨王仁贍賜南唐禮物戊戌禁邊民盜塞外馬辛丑丹州大雨雹丙午葬明憲皇太后于安陵十一月辛酉朔不視朝甲子太后祔廟己巳幸相國寺遂

幸國子監癸酉沙州節度使曹元忠瓜州團練使曹  
延繼等遣使獻王鞍勒馬十二月壬申回鶻可汗景瓊  
遣使來獻方物乙未李繼勲敗北漢軍俘遼州刺史  
傅廷彥弟勲來獻辛丑幸新修河倉庚戌敗于近郊  
癸丑遣使賜南唐吳越馬羊橐駝有差

三年春正月庚申朔以喪不受朝賀己巳淮南饑振  
之庚午幸迎春苑宴射甲戌廣皇城詔郡國長吏勸  
民播種丙子瓜沙歸義節度使曹元忠獻馬庚辰女  
直國遣使尺骨來獻詔郡國不得役道路居民癸未  
幸國子監二月丙辰復幸國子監遂如迎春苑宴從

官庚寅詔文班官舉堪爲賓佐令錄者各一人不當  
者比事連坐甲午詔自今百官朝對須陳時政利病  
無以觸諱爲懼乙未滑州節度使張建豐坐失火免  
官己亥更定竊盜律壬午上謂侍臣曰朕欲武臣盡  
讀書以通治道何如左右不知所對甲寅北漢寇潞  
晉守將擊走之三月戊午朔厭次霽霜殺桑壬戌三  
佛齊國遣使來獻癸亥禱雨丁卯幸太清觀遂幸開  
封尹後園宴射己巳大雨詔申律文諭郡國犯大辟  
者刑部審覆乙亥遣使賜南唐主生辰禮物丁丑女  
直國遣使來獻丁亥命徙北漢降人于邢洺夏四月

乙未延州大雨雪趙衛二州旱丙申寧州大雨雪溝  
洫水戊戌幸太清觀庚子回鶻阿督等來獻方物壬  
寅冊州雪二尺乙巳贈兄光濟為邕王弟光贊為瓊  
王追冊夫人賀氏為皇后五月甲子幸相國寺禱雨  
遂幸迎春苑宴射乙亥海州火開太行運路癸未命  
使檢諸州旱甲申詔均戶役敢蔽占者有罪復幸相  
國寺禱雨乙酉廣大內齊博德相霸五州自春不雨  
以旱減膳徹樂六月辛卯振宿州饑癸巳吳建祚以  
雄武軍節度使罷乙未賜酒國子監丁酉幸太清觀  
己亥減京畿河北死罪以下壬寅京師雨壬子蕃部

尚波于等爭採造務以兵犯渭北知秦州高防擊走之乙卯幸迎春苑宴射黃陂縣有象自南來食稼秋七月庚申南唐遣其臣翟如璧謝賜生辰禮貢金銀錦綺千萬壬戌放南唐降卒弱者數千人歸國乙丑免舒州蕲蒲新稅丁卯潞州大雨雹索內外軍不律者配沙門島己卯北漢捉生指揮使路貴等來降辛巳遣從臣十人檢河北旱癸未充濟德磁洺五州鰥八月癸巳蔡河務綱官王訓等四人坐以糠土雜軍糧磔于市乙未用知制誥高錫言諸行賂獲薦者許告訐奴婢隣親能告者賞詔注諸道司法參軍皆以

律疏試判詔尚書吏部舉書判拔萃科九月庚午吐  
蕃尚波于等歸伏羌縣地壬申脩武成王廟丙子占  
城國來獻禁伐桑棗冬十月乙酉朔賜百官冬服有  
差丙戌幸太清觀遂幸造船務觀習水戰己亥幸岳  
臺命諸軍習騎射復幸玉津園辛丑以樞密副使趙  
普為樞密使辛亥畋近郊十一月癸亥禁奉使請托  
縣令考課以戶口增減為黜陟丙寅南唐遣其臣顧  
彝來朝丙子三佛齊國遣使李麗林等來獻高麗國  
遣李興祐等來朝己卯畋于近郊壬午賜南唐建隆  
四年曆十二月丙戌詔縣置尉一員理盜訟置弓手

視縣力爲差戊戌蒲晉慈隰相衛六州饑振之庚子  
班捕盜令甲辰衡州刺史張文表叛是歲周鄭王出  
居房州

乾德元年春正月甲寅朔不御殿乙卯發關西鄉兵  
赴慶州丁巳脩畿內河隄己未遣使賜南唐吳越馬  
橐駝羊有差庚申遣山南東道節度使慕容延釗率  
十州兵以討張文表乙丑幸造船務觀造戰船甲戌  
詔荆南發水卒三千應延釗于潭己卯女直國遣使  
來獻三月壬辰周保權將楊師璠梟文表于朗陵市  
甲午慕容延釗入荆南高繼冲請歸朝得州三縣十

七乙未克潭州辛亥澶滑衛魏晉絳蒲孟八州饑命  
發廩振之三月辛未幸金鳳園習射七發皆中符彥  
卿等進馬稱賀乃徧賜從臣名馬銀器有差壬申高  
繼冲籍其錢帛芻粟來上癸酉班新定律戊寅慕容  
延釗破三江口下岳州克復朗州湖南平得州十四  
監一縣六十六夏四月旱甲申徧禱京城祠廟夕雨  
減荆南朗州潭州管内死罪一等鹵掠者給主乙酉  
遣使祭南岳丁亥幸國子監遂幸武成王廟宴射玉  
津園庚寅出內錢募諸軍子弟鑿習戰池辛卯建隆  
應天曆成御製序壬辰賞湖南立功將士癸巳幸玉



津園丙申兵部郎中曹匪躬棄市海陵鹽城屯田副  
使張藹除名並坐不法庚子荆南節度使高繼冲進  
助宴金銀羅純柱衣屏風等物癸卯辰錦叙等州歸  
順甲辰詔疏鑿三門禁涇原邠慶等州補蕃人爲邊  
鎮將夏西平王李彝興獻犂牛一乙巳幸玉津園閱  
諸軍騎射丙午免湖南茶稅禁峽州鹽井辛亥貸澶  
州民種食五月壬子朔禱雨京城甲寅遣使禱雨嶽  
瀆乙丑廣大內庚午給荆南管內符印癸酉幸玉津  
園六月乙酉免潭州諸縣無名配歛壬辰暑罷營造  
賜工匠衫履乙未詔荆南兵願歸農者聽丙申詔歷

代帝王三年一饗立漢光武唐太宗廟己亥澶濮曹絳蝗命以牢祭庚子百官三上表請舉樂從之減左右仗千牛員丙午雨詔蜡祀廟社皆用戌臙一日己酉命習水戰于新池秋七月辛亥朔定州縣所置雜職承符廳子等名數甲寅以湖湘歿王事靳彥朗男承勲等三十人補殿直丙辰幸新池賜役夫錢遂幸玉津園丁巳安國軍節度使王全斌等率兵入太原境以俘來獻給錢米以釋之己未詔民有疾而親屬遺去者罪之癸亥湖南疫賜行營將校藥丁卯辛武成王廟遂幸新池觀習水戰己巳朗州賊將汪端寇

州城都監尹重睿擊走之詔免荆南管内夏稅之半  
甲戌釋周保權罪乙亥詔繕朗州城免其管内夏稅  
丁丑分命近臣禱雨己卯班重定刑統等書八月壬  
午殿前都虞候張瓊以陵侮軍校史珪石漢卿等爲  
所誣譖下吏瓊自殺丙戌遣給事中劉載朝拜安陵  
丁亥王全斌攻北漢樂平縣降之辛卯以樂平縣爲  
平晉軍降卒千八百人爲效順軍人賜錢帛壬辰詔  
九經舉人下第者再試癸巳女直國遣使獻名馬蠲  
登州沙門島民稅令專治船渡馬丙申北漢靜陽十  
八砦首領來降泉州陳洪進遣使來朝貢齊州河決

京師雨己亥契丹幽州岐溝關使柴廷翰等來降癸卯宰相質率百官上尊號不允九月甲寅三上表請從之丙寅宴廣政殿始用樂丁卯責宣徽南院使兼樞密副使李處耘爲淄州刺史戊辰女直國遣使獻海東青名鷹丙子禁朝臣公薦貢舉人賜南唐羊萬口磔汪端于朗州戊寅北漢引契丹兵攻平晉遣洺州防禦使郭進等救之冬十月庚辰詔州縣徵科置簿籍己亥田近郊丁未吳越國王進郊祀禮金銀珠器犀象香藥皆萬計十一月乙卯荆南節度使高繼冲進郊祀銀萬兩甲子有事南郊大赦改元乾德百

官奉玉冊上尊號曰應天廣運仁聖文武至德皇帝  
丙寅南唐進賀南郊尊號銀絹萬計丁卯賜近臣襲  
衣金帶器幣鞍馬有差乙亥畋近郊十二月庚辰殿  
前祗候李璘以父讐殺負僚陳友璘自首義而釋之  
辛巳開封府尹光義興元尹光美各益食邑賜功臣  
號宰相質溥仁浦並特進易封益食邑樞密使普加  
光祿大夫易功臣號文武臣僚各進階勲爵邑甲申  
皇后王氏崩辛卯罷登州都督己亥泉州陳洪進遣  
使貢白金千兩乳香茶藥皆萬計己巳南唐主上表  
乞呼名詔不允閏月己酉朔校醫官黜其藝不精者

二十二人甲寅命近臣祈雪丁卯覆試拔萃科田  
封宋白譚利用等稱旨賜與有差辛未卜安陵于鞏  
縣乙亥折德哀敗北漢軍于城下禽其將楊璘以太  
常議奉赤帝爲感生帝

二年春正月辛巳諭郡國長吏勸農耕作有象入南  
陽虞人殺之以齒革來獻京師雨雪雷癸未辛迎春  
苑宴射甲申詔著四時聽選式回鶻遣使獻方物戊  
子質以太子太傅溥以太子太保仁浦仍尚書左僕  
射罷庚寅以趙普爲門下侍郎同中書門下平章事  
李崇矩樞密使壬辰詔親試制舉三科不限官庶許

直詣閣門進狀甲辰詔諸道獄詞令大理刑部檢詳  
或淹留差失致中書門下改正者重其罪乙巳幸王  
津園宴射丁未詔縣令簿尉非公事毋至村落令錄  
簿尉諸職官有耄耄篤疾者舉劾之二月戊申朔北  
漢遼州刺史杜延諤以城來降癸丑遣使振陝州饑  
導渭水入京丁巳治安陵隧壞役兵壓死者二百人  
命有司瘞恤庚午府州俘北漢衛州刺史 楊璘來  
獻甲戌南唐進改葬安陵銀綾絹各萬計浚汴河三  
月辛巳幸教船池賜水軍將士衣有差還幸玉津園  
宴射乙未北漢耀州團練使周審玉等來降丁酉遣

使祈雨于五嶽禁臣僚往來假官軍部送辛丑遣攝  
太尉光義奉冊寶上明憲皇太后謚曰昭憲皇后賀  
氏謚曰孝惠王氏謚曰孝明夏四月丁未朔策賢良  
方正直言極諫科博州判官顏贄中第戊申振河中  
饑已酉免諸道今年夏稅之無苗者乙卯葬昭憲皇  
太后孝明皇后于安陵乙丑始置叅知政事以兵部  
侍郎薛居正呂餘慶爲之己巳靈武饑轉沔粟以饗  
壬申祔二后于別廟徙永州諸縣民之畜蠱者三百  
二十六家于縣之僻處不得復齒於鄉五月己卯知  
制誥高錫坐受藩鎮賂貶萊州司馬辛巳宗正卿趙



礪坐駐杖除籍癸未辛王津園宴射六月己酉以光  
義爲中書令光義同中書門下平章事子德昭貴州  
防禦使庚申辛相國寺遂辛教船池王津園辛未河  
南北及秦諸州蝗惟趙州不食稼秋七月乙亥春州  
暴水溺民庚辰邵陽雨雹辛巳辛王津園還辛新池  
觀習水戰辛卯詔翰林學士陶穀竇儀等舉堪爲藩  
郡通判者各一人不當者連坐九月甲戌朔周易博  
士奚嶼責乾州司戶庫部員外王貽孫責左贊善大  
夫並坐試任子不公戊子延州雨雹乙未辛北郊觀  
稼辛丑太子太傅竇晏壬寅潘美等克郴州冬十月

戊申周紀王熙謹薨輟視朝十一月甲戌命忠武軍  
節度使王全斌爲西川行營前軍兵馬都部署武信  
軍節度崔彥進副之將步騎三萬出鳳州道江寧軍  
節度使劉光義爲西川行營前軍兵馬都部署樞密  
承旨曹彬副之將步騎二萬出歸州道以伐蜀乙亥  
宴西川行營將校于崇德殿示川峽地圖授攻取方  
畧賜金玉帶衣物各有差壬辰畋近郊十二月乙巳  
釋廣南郴州都監陳珣等二百人戊申劉光義拔夔  
州蜀節度高彥儔自焚丁巳蠲歸峽秋稅辛酉王全  
斌克萬仞燕子二砦下興州連拔石圖等二十餘砦

甲子光義拔巫山等砦斬蜀將南光海等八千級禽  
其戰懼都指揮袁德宏等千二百人全斌先鋒史進  
德敗蜀人于三泉砦禽其節度使韓保正李進等南  
唐進銀二萬兩金銀器皿數百事庚午詔招復山林  
聚匿辛未畋北郊

本紀卷第一

本紀卷第二

宋史二

開禧二  
年  
上  
桂  
國  
錄  
軍  
國  
事  
前  
書  
右  
丞  
相  
韓  
侂  
胄  
領  
經  
筵  
事  
都  
察  
院  
等  
奉  
勅  
修

太祖二

三年春正月癸酉朔以出師不御殿甲戌王全斌克  
劔門斬首萬餘級禽蜀樞密使王昭遠澤州節度趙  
崇韜乙亥詔瘞征蜀戰死士卒被傷者給繒帛壬午  
全斌取利州乙酉蜀主孟昶降得州四十五縣一百  
九十八戶五十三萬四千三十有九高麗國王遣使  
來朝獻戊子吏部郎中鄧守中坐試吏不當責本曹

員外郎癸巳劉光義取萬施開忠四州遂州守臣陳  
愈降乙未詔撫西川將吏百姓丙申赦蜀歸俘獲除  
管内逋賦免夏稅及汭徵物色之半二月癸卯南唐  
吳越進長春節御衣金銀器錦綺以千計甲辰遣皇  
城使竇思儼迎勞孟昶丁未全州大水庚申王全斌  
殺蜀降兵二萬七千人於成都三月癸酉詔置義倉  
是月兩川賊群起先鋒都指揮使高彥暉死之詔所  
在攻討夏四月乙巳回鶻遣使獻方物癸丑職方員  
外郎李岳坐賊棄市南唐進賀收蜀銀絹以萬計戊  
午遣中使給蜀臣鞍馬車乘于江陵癸亥募諸軍子

第導五丈河通皇城為池五月辛未朔詔還諸道幕  
職令錄經引對者以涉途遠近差減其選壬申辛迎  
春苑宴射乙亥遣開封尹光義勞孟昶於玉津園丙  
戌見孟昶於崇元殿宴昶等於大明殿丁亥賜將士  
衣服錢帛戊子大赦減死罪一等壬辰宴孟昶及其  
子弟於大明殿六月甲辰以孟昶為中書令秦國公  
昶子弟諸臣錫爵有差庚戌孟昶薨秋七月珍州刺  
史田景遷內附壬辰追封孟昶為楚王丁酉辛教船  
池遂幸玉津園宴射八月戊戌朔詔籍郡國驍勇兵  
送闡下癸卯河決陽武縣庚戌詔王全斌等廩蜀亡

命兵士家乙卯河溢河陽壞民居戊午殿直成德鈞  
坐賊棄市己未鄆州河水溢沒田辛酉壽星見九月  
己巳閱諸道兵以騎軍為驍雄步軍為雄武並隸親  
軍壬申詔蜀諸郡各置克寧軍五百人辛巳河決澶  
州戊子幸西水磴十月丁酉朔大霧己未太子中舍  
王治坐受賊殺人棄市丙寅濟水溢鄒平十一月丙  
子甘州回鶻可汗遣僧獻佛牙寶器乙未劔州刺史  
張仁謙坐殺降貶宋州教練十二月丁酉朔詔婦為  
舅姑喪者齊斬己亥詔西川管内監軍巡檢毋預州  
縣事戊午甘州回鶻可汗于闐國王等遣使來朝進

馬千匹橐駝五百頭玉五百團琥珀五百斤

四年春正月丙子遣使分詣江陵鳳翔賜蜀羣臣家  
錢帛丁亥命丁德裕等率兵巡撫西川己丑幸迎春  
苑宴射二月癸卯視皇城役丙辰于闐國王遣其子  
德從來獻安國軍節度使羅彥瓌等敗北漢於靜陽  
擒其將鹿英辛酉試下第舉人甲子免西川今年夏  
稅及諸徵之半田不得耕者盡除之岳州火三月癸  
酉罷義倉甲戌占城國遣使來獻癸未僧行勤等一  
百五十七人各賜錢三萬遊西域夏四月丁酉占城  
遣使來獻丙午潭州火壬子罷光州貢鷹鷄丁巳契



丹天德軍節度使于延超與其子來降進士李藹坐  
毀釋氏辭不遜黥杖配沙門島庚申幸燕國長公主  
第視疾五月南唐賀文明殿成進銀萬兩甲戌光祿  
少卿郭玘坐賊棄市乙亥閱蜀法物圖書丁丑詔蜀  
郡敢有不省父母疾者罪之辛巳潭州火壬午澶州  
進麥兩岐至六岐者百六十五本辛卯熒惑犯軒轅  
六月甲午東阿河溢甲辰河決觀城月犯心前星丙  
午澧州刺史白全紹坐縱紀綱規財部內免官詔人  
臣家不得私養宦者內侍年三十以上方許養一子  
士庶敢有鬻童男者不赦己酉果州貢朱一莖十三

穗秋七月丙寅詔蜀官將吏及姻屬疾者所在給醫藥錢帛戊辰西南夷首領董暲等內附己巳幸造船務又幸開封尹北園宴射癸酉賜西川行營將士錢帛有差庚辰罷劔南蜀米麥征華州旱免今年租給州縣官奉戶八月丁酉詔除蜀倍息庚子水壞高苑縣城壬寅詔憲臣及吏刑部官三周歲滿日即轉授加恩庚戌樞密直學士馮瓚綾錦副使李美殿中侍御史李櫟為宰相趙普陷以賊論死會赦流沙門島逢恩不還辛亥幸玉津園宴射京兆府貢野蠶繭士子衡州火乙卯錄囚丙辰河決滑州壞靈河大隄晉

州免食稼閏月乙丑河溢入南華縣己巳衡州火乙亥詔民能樹藝開墾者不加征令佐能勸來者受賞九月壬辰朔水虎捷指揮使孫進龍衛指揮使吳瑤等二十七人坐黨呂翰亂伏誅夷進族庚子占城獻馴象乙巳幸教船池遂幸玉津園觀衛士騎射丙午詔吳越立禹廟于會稽冬十月辛酉朔命太常復二舞癸亥詔諸郡立古帝王陵廟置戶有差己巳禁吏卒以巡察擾民十二月庚辰妖人張龍兒等二十四人伏誅夷龍兒李玉楊密聶贊族

五年春正月戊戌治河隄丁未合州漢初縣上青樛

木中有文曰大連宋甲寅王全斌等坐伐蜀黷貨殺降全斌責崇義軍節度使崔彥進責昭化軍節度使王仁贍責右衛大將軍丙辰詔伐蜀將校有受蜀人錢物者並即還主丁巳賞伐蜀功曹彬劉光義等進爵有差二月庚申朔辛造船務遂辛城西觀衛士騎射甲子薛居正呂餘慶並為吏部侍郎依前叅知政事己丑幸教船池三月甲辰詔翰林學士常參官於幕職州縣及京官內各舉堪任常參官者一人不當者連坐乙巳詔諸道舉部內官吏才德優異者丙午以普為尚書左僕射兼門下侍郎同中書門下平章

事崇矩檢校太傅是日幸教船池又幸玉津園宴射  
丙辰北漢石盆砦招收指揮使閻章以砦來降五星  
聚奎夏五月乙巳賜京城貧民衣北漢鴻唐砦招收  
指揮使樊暉以砦來降甲寅王溥為太子太傅六月  
戊午朔日有食之辛巳幸建隆觀遂幸飛龍院丁亥  
狝犴順化王子等來獻方物七月丁酉禁毀銅佛像  
己酉免水旱災戶今年租八月甲申河溢入衛州城  
民溺死者數百九月壬辰倉部員外郎陳郾坐贓棄  
市甲午西南蕃順化王子部才等遣使獻方物己酉  
畋近郊十一月乙酉朔工部侍郎毋守素坐居喪娶

妾免供奉武仁海坐枉殺人棄市十二月丙辰禁新  
小鐵鑷等錢踈惡布帛入粉藥者癸酉升麟州為建  
寧軍節度趙普以母憂去位丙子起復

開寶元年春正月甲午增治京城陝之集津絳之垣  
曲懷之武陟饑振之己亥北漢偏城砦招收指揮使  
任恩等來降三月庚寅班縣令尉捕盜令癸巳幸王  
津園乙巳有馴象自至京師夏四月乙卯幸節度使  
趙彥徽第視疾五月丁未賜南唐米麥十萬斛六月  
癸丑朔詔民田為霖雨河水壞者免今年夏稅及沿  
徼物癸亥詔荆蜀民祖父母父母在者子孫不得別

財異居丁丑太白晝見戊寅復見辛巳龍出單父民  
家井中大風雨漂民舍四百區死者數十人秋七月  
丙申幸鐵騎營賜軍錢羊酒有差北漢潁州砦主胡  
遇等來降丙午幸鐵騎營遂幸玉津園戊申坊州刺  
史李懷節坐強市部民物責左衛率府率北漢主劉  
鈞卒養子繼恩立八月乙卯按鵠于近郊還幸相國  
寺戊午又按鵠于北郊還幸飛龍院丙寅遣客省使  
盧懷忠等二十二人率禁軍會潞州戊辰命昭化軍  
節度使李繼勳等征北漢九月辛巳朔禁錢出塞癸  
未監察御史楊士達坐鞠獄濫殺棄市庚子李繼勳

敗北漢於銅溫河已酉北漢供奉官侯霸榮弑其主  
繼恩繼元立冬十月己未畋近郊還幸飛龍院丙子  
吳越王遣其子惟濟來朝貢十一月癸卯日南至有  
事南郊改元開寶大赦十惡殺人官吏受賊者不原  
宰相晉等奉玉冊寶上尊號曰應天廣運大聖神武  
明道至德仁孝皇帝十二月甲子行慶自開封興元  
尹宰相樞密使及諸道蕃侯並加勳爵有差乙丑大  
食國遣使獻方物

二年春正月己卯朔以出師不御殿二月乙卯命昭  
化軍節度使李繼勲為河東行營前軍都部署侍衛



步軍指揮使党進副之宣徽南院使曹彬為都監棣  
州防禦使何繼筠為石嶺關部署建雄軍節度使趙  
贊為汾州路部署以伐北漢宴長春殿命彰德軍節  
度使韓仲贇為北面都部署彰義軍節度使郭延義  
副之以防契丹戊午詔親征己酉以開封尹光義為  
上都留守樞密副使沈義倫為大内部署判留司三  
司事甲子發京師乙亥雨駐潞州三月壬辰發潞州  
乙未李繼勲敗北漢軍於太原城下戊戌駕傳城下  
庚子觀兵城南築長連城辛丑幸汾河作新橋發太  
原諸縣丁數萬集城下癸卯北漢史昭文以憲州來降

乙巳臨城南謂汾水可以灌其城命築長隄壅之決  
晉祠水注之遂砮城四面繼勲軍於南贊軍於西彬  
軍於北進軍於東乃北引汾水灌城辛亥遣海州刺  
史孫方進率兵圍汾州四月戊申幸城東觀築隄壬  
子復幸城東己未何繼筠敗契丹於陽曲斬首數千  
級俘武州刺史王彥符以獻命陳示所獲首級鎧甲  
于城下壬戌幸汾河觀造船戊辰幸城西上生院丙  
子復幸城西五月癸未韓仲贊敗契丹於定州北自  
戊子至庚寅命水軍載弩環攻橫州團練使王庭義  
殿前都虞候石漢卿死之甲午北漢趙文度以嵐州

來降甲辰都虞候趙廷翰奏諸軍欲登城以死攻上  
愍之不允閏月戊申雉圯水注城中上遽登隄觀己  
酉右僕射魏仁浦薨壬子以太常博士李光贊言議  
班師己未命兵士遷河東民萬戶于山東庚申分命  
使臣率兵赴鎮潞壬戌駕還戊辰駐蹕於鎮州六月  
丙子朔發鎮州癸巳至自太原曲赦京城囚秋七月  
丁巳幸封禪寺詔鎮深趙邢洛五州管内鎮砦縣悉  
城之甲子大宴賜宰相樞密使翰林學士節度觀察  
使襲衣金帶戊辰西南夷順化王子武才等來獻方  
物癸酉幸新水礮汴決下邑乙亥壽星見八月丁亥

詔川峽諸州察民有父母在而別籍異財者論死九月乙巳朔幸武成王廟壬戌幸玉津園宴射冬十月戊子畋近郊庚寅散指揮都知杜延進等謀反伏誅夷其族詔相深趙三州丁夫死太原城下者復其家庚子以王溥為太子太師武衡德為太子太傅癸卯西川兵馬都監張延通內臣張嶼引進副使王珣為丁德裕所譖延通坐不遜誅嶼珣並杖配十一月丙午幸鎮寧軍節度使張令鐸第視疾甲寅畋近郊還幸金鳳園庚申回鶻于闐遣使來獻方物十二月癸未幸中書視宰相趙普疾己亥右贊善大夫王昭坐

監大盈倉其子與倉吏為姦賊奪兩任配隸汝州丁  
德裕誣奏西川轉運使李鉉指斥事既直猶坐酒失  
責授右贊善大夫

三年春正月癸卯朔雨雪不御殿癸丑增河堤辛酉  
詔民五千戶舉孝弟彰聞德行純茂者一人奇才異  
行不拘此限里閭郡國逋審連署以聞仍為治裝詣  
關二月庚寅幸西茶庫遂幸建隆觀三月庚戌詔閱  
進士十五舉以上司馬浦等百六人並賜本科出身  
辛亥賜處士王昭素國子博士致仕丙辰殿中丞張  
顥坐先知潁州政不平免官己未幸宰相趙普第視

疾復四月辛未朔日有食之丁亥幸寺觀禱雨辛卯  
雨甲午幸教船池己亥罷河北諸州鹽禁詔郡國非  
其土產者勿貢五月丁未禁京城民畜兵器癸丑幸  
城北觀水碓癸亥賜諸班營舍為雨壞者錢有差六  
月乙未禁諸州長吏親隨人掌廂鎮局務秋七月乙  
巳立報水旱期式壬子詔蜀州縣官以戶口差第省  
員加祿尋詔諸路亦如之戊辰幸教船池又幸玉津  
園宴射八月戊子幸教船池又幸玉津園九月己亥  
朔命潭州防禦使潘美為貴州道兵馬行營都部署  
朗州團練使尹崇珂副之遣使發十州兵會賀州以

伐南漢甲辰詔西京鳳翔雄耀等州周文成康三王  
秦始皇漢高文景武元成哀七帝後魏孝文西魏文  
帝後周太祖唐高祖太宗中宗肅宗代宗德順文武  
宣懿僖昭諸帝凡二十七陵嘗被盜發者有司備法  
服常服各一襲具棺槨重葬所在長吏致祭己酉幸  
開寶寺觀新鐘丙辰女直國遣使齎定安國王烈萬  
華表獻方物丁卯潘美等敗南漢軍萬衆於富州下  
之十月庚辰克賀州十一月壬寅下昭桂二州乙巳  
減桂陽歲貢白金額癸丑右領軍衛將軍石延祚坐  
監倉與吏為姦賊棄市癸亥定州駐泊都監田欽祚

敗契丹於遂城丙寅以曹州舉德行孔蟾為章立主  
簿十二月壬申潘美等下連州辛卯大敗南漢軍萬  
餘於韶州下之癸巳增河隄

四年春正月戊戌朔以出師不視朝丙午罷諸道州  
縣攝官丁未右千牛衛大將軍桑進興坐賊棄市癸  
丑潘美等取英州雄州二月丁亥南漢劉鋹遣其左  
僕射蕭灌等以表來上己丑潘美克廣州俘劉鋹廣  
南平得州六十縣二百十四戶十七萬二百六十三  
辛卯大赦廣南免二稅偽署官仍舊三月乙未幸飛  
龍院賜從臣馬丙申詔廣南有買人男女為奴婢轉



傭利者並放免偽政有害于民者具以聞除之增前  
代帝王守陵戶二夏四月丙寅朔前左監門衛將軍  
趙玘訴宰相趙普坐誣毀大臣汝州安置丁卯三佛  
齊國遣使獻方物己巳詔禁嶺南商稅鹽麴如荆湖  
法辛未幸永興軍節度使吳廷祚第視疾癸未幸開  
寶寺辛卯南唐遣其弟從諫來朝貢發廂軍千人脩  
前代陵寢之在秦者壬辰監察御史閻丘舜卿坐前  
任盜用官錢棄市五月乙未朔御明德門受劉鋹俘  
釋之斬其柄臣龔澄樞李托薛崇譽大宴於大明殿  
鋹預焉丁酉賞伐廣南功潘美尹崇珂等進爵有差

六月癸酉遣使祀南海丁丑命翰林試南漢官取書  
判稍優者授令錄簿尉壬午以孝子羅居通為延州  
主簿封劉鋹為恩赦侯乙酉罷賀州銀場賜劉鋹月  
奉外錢五萬米麥五十斛河決原武汴決穀熟秋七  
月戊戌賜開封尹光義門戟十四庚子幸新脩水碓  
賜役人錢帛有差戊午復著內侍養子令癸亥幸建  
武軍節度使何繼筠第視疾汴決宋城八月壬申文  
武百官上尊號不允辛卯景星見冬十月癸亥朔日  
有食之己巳詔偽作黃金者棄市庚午太子洗馬王  
元吉坐賊棄市辛巳除廣南舊無名配斂甲申詔十

月後犯強竊盜者郊赦不原丙戌放廣南民毆充軍者十一月癸巳朔南唐遣其弟從善吳越國王遣其子惟濬以郊祀來朝貢南唐主煜表乞去國號呼名從之庚戌詔諸道所罷攝官三任無遺闕者以聞炯澶州通判姚恕坐不即上聞棄市己未日南至有事南郊大赦十惡故劫殺官吏受賊者不原詔置諸州幕職官奉戶壬戌蜀班內殿直四十人援御馬直例乞賞遂擢登聞鼓命各杖二十翌日悉斬于營都指揮單斌等皆杖降十二月癸亥朔賜南郊執事官器幣有差丁卯行慶開封尹光義興元尹光美貴州防

御使德昭宰相趙普並益食邑己巳内外文武官遞  
進勲爵辛未賜九經李符本科出身壬午畋近郊

本紀卷第二



本紀卷第三

宋史三

開府儀同三司桂國錄軍國事尚書丞相監修國史領經筵事都總裁

勅修

太祖三

五年春正月壬辰朔雨雪不御殿禁鐵鑄浮屠及佛像  
庚子前盧縣尉鄢陵許永年七十有五自言父瓊  
年九十九兩兄皆八十餘乞一官以便養因召瓊厚  
賜之授永鄢陵令壬寅省州縣小吏及直力人乙巳  
罷襄州歲貢魚二月丙子詔沿河十七州各置河隄  
判官一員庚辰以鳳州七房銀冶爲開寶監庚寅以

兵部侍郎劉熙古參知政事閏月壬辰禮部試進士  
安守亮等諸科共三十八人召對講武殿始放榜庚  
戌升密州爲安化軍節度三月庚午賜潁州龍騎指  
揮使仇興及兵士錢辛未占城國王波美稅遣使來  
獻方物壬申幸教船池習戰乙酉殿中侍御史張穆  
坐贓棄市夏四月庚寅朔三佛齊國主釋利烏耶遣  
使來獻方物丙午遣使檢視水災田丙寅遣使諸州  
捕虎五月庚申賜恩赦侯劉錕錢一百五十萬乙丑  
命近臣祈晴併廣南州十三縣三十九丙寅罷嶺南  
採珠媚川都卒爲靜江軍辛未河決濮陽命潁州團

練使曹翰往塞之甲戌以霖雨出後宮五十餘人賜  
予以遣之丁亥河南北淫雨澶滑濟鄆曹濮六州大  
水六月己丑河決陽武汴決穀熟丁酉詔淫雨河決  
沿河民田有爲水害者有司具聞除租戊申修陽武  
隄秋七月己未朔右拾遺張洎坐賊棄市癸未邕容  
等州獠人作亂庚寅高麗國王王昭遠遣使獻方物  
八月己亥廣州行營都監朱憲大破獠賊於容州癸  
卯升宿州爲保靜軍節度罷密州仍爲防禦九月丁  
巳朔日有食之癸酉李崇矩以鎮國軍節度使罷冬  
十月庚子辛河陽節度使張仁超第視疾甲辰試道



流不才者勒歸俗十一月己未李繼明藥繼清大破  
獠賊於英州癸亥禁僧道習天文地理己巳禁舉人  
寄應庚辰命參知政事薛居正呂餘慶兼淮湖嶺蜀  
轉運使十二月乙酉朔祈雪己亥畋近郊開封尹光  
義暴疾遂如其第視之甲寅內班董延諤坐監務盜  
芻粟杖殺之詔合入令錄者引見後方注乙卯大雨  
雪是歲大饑

六年春正月丙辰朔不御殿置蜀水陸轉運計度使  
癸酉修魏縣河二月丙戌朔棣州兵馬殿直傅延翰  
謀反伏誅丙申曹州饑漕太倉米二萬石振之己亥

吳越國進銀裝花舫金香師子三月乙卯朔周鄭王  
殂于房州上素服發哀輟朝十日謚曰恭帝命還葬  
慶陵之側陵曰順陵己未復密州爲安化軍節度庚  
申覆試進士於講武殿賜宋準及下第徐士廉等諸  
科百二十七人及第乙亥賜宋準等宴錢二十萬大  
食國遣使來獻翰林學士知貢舉李昉坐試人失當  
責授太常少卿試朝臣死王事者子陸坦等賜進士  
出身丙子宰相國寺觀新脩塔夏四月丁亥召開封  
尹光義天平軍節度使石守信等賞花日射於苑中  
辛丑遣盧多遜爲江南國信使甲辰占城國王悉利

陀盤印茶遣使來獻方物丙午黎州保塞蠻來歸戊  
申詔脩五代史五月庚申劉熙古以戶部尚書致仕  
詔中書吏擅權多姦賊兼用流內州縣官己巳交州  
丁璉遣使貢方物辛王津園觀刈麥辛巳殺右拾遺  
馬適六月辛卯閱在京百司吏黜爲農者四百人癸  
巳占城國遣使獻方物隰州巡檢使李謙溥拔北漢  
七砦癸卯雷有鄰告宰相趙普黨臺吏胡贊等不法  
贊及李可度並杖籍沒庚戌詔參知政事與宰相趙  
普分知印押班奏事秋七月壬子朔詔諸州府置司  
寇參軍以進士明經者爲之丙辰減廣南無名率錢

八月乙酉罷成都府僞蜀嫁裝稅辛卯賜布衣王澤  
方同學究出身丁酉泗州推官侯濟坐試判假手杖  
除名甲辰趙普罷爲河陽三城節度使同平章事辛  
酉幸都亭驛九月丁卯餘慶以尚書左丞罷己巳封  
光義爲晉王兼侍中德昭同中書門下平章事薛居  
正爲門下侍郎同平章政事戶部侍郎樞密副使沈  
義倫爲中書侍郎同平章事石守信兼侍中盧多遜  
中書舍人參知政事壬申詔晉王光義班宰相上冬  
十月甲申葬周恭帝不視朝丁亥幸玉津園觀稼戊  
子流星出文昌北斗甲辰特赦諸官吏姦賊十一月

癸丑詔常參官進士及第者各舉文學一人十二月  
壬午命近臣祈雪丙午前中書舍人參知政事多遜  
起復視事行開寶通禮限度僧法諸州僧帳及百人  
歲許度一人

七年春正月庚戌不御殿庚申占城國王波美稅遣  
使獻方物齊州野蠶成繭癸亥左拾遺秦亶太子中  
允呂鵠並坐贓宥死杖除名二月庚辰朔日有食之  
丙戌日有二黑子癸卯命近臣祈雨詔詩書易三經  
學究依三經三傳資叙入官乙巳太子中舍胡德冲  
坐隱官錢棄市三月乙丑三佛齊國王遣使獻方物

夏四月丙午遣使檢嶺南民田五月戊申朔殿中侍御史李瑩坐受南唐餽遺責授左贊善大夫甲寅以布衣齊得一爲章丘主簿乙丑詔市二價者以枉法論丙寅幸講武池觀習水戰丙子又幸講武池遂幸玉津園六月丙申河中府饑發粟三萬石振之己亥淮溢入泗州城壬寅安陽河溢皆壞民居秋七月壬子幸講武池觀習水戰遂幸玉津園丙辰南丹州溪洞酋帥莫洪燕內附詔減成都府鹽錢庚午太子中允李仁交坐不法棄市八月戊寅吳越國王遣使來朝貢丁亥諭吳越伐江南戊子陳州貢芝草一本四

十九莖已丑幸講武池賜習水戰軍士錢戊戌殿中  
丞趙象坐擅稅除名甲辰幸講武池觀習水戰遂幸  
玉津園九月癸亥命宣徽南院使義成軍節度使曹  
彬爲西南路行營馬步軍戰權都部署山南東道節  
度使潘美爲都監潁州團練使曹翰爲先鋒都指揮  
使將兵十萬出荆南以伐江南將行召曹彬潘美戒  
之曰城陷之日慎無殺戮設若困鬪則李煜一門不  
可加害丁卯以知制誥李穆爲江南國信使冬十月  
甲申幸迎春苑登汴隄觀戰艦東下丙戌又幸迎春  
苑登汴隄觀諸軍習戰遂幸東水門發戰權東下江

南進絹數萬御衣金帶器用數百事壬辰曹彬等將  
舟師步騎發江陵水陸並進丁酉命吳越王錢俶爲  
昇州東南行營招撫制置使己亥曹彬收下峽口獲  
指揮使王仁震王宴錢與閏月己酉克池州丁巳敗  
江南軍于銅陵庚申命宰相參知政事更知日曆壬  
戌彬等拔蕪湖當塗兩縣駐軍采石癸亥詔減湖南  
新製茶甲子薛居正等上新編五代史賜器幣有差  
丁卯彬敗江南軍于采石擒兵馬部署楊叔都監孫  
震等千人爲浮梁以濟十一月癸未黥李從善部下  
及江南水軍一千三百九十人爲歸化軍甲申詔省



劔南山南等道屬縣主簿丁亥秦晉旱免蒲陝晉絳  
同解六州逋賦關西諸州免其半己丑知漢陽軍李  
恕敗江南水軍于鄂甲午曹彬敗江南軍於新竹砦  
辛丑命知雄州孫全興荅涿州修好書壬寅大食國  
遣使獻方物十二月己酉彬敗江南軍於白鷺州辛  
亥命近臣析雪甲子吳越王帥兵圍常州獲其人馬  
尋拔利城砦丙寅彬敗江南軍於新林港己巳左拾  
遺劉棋坐受賂黥面杖配沙門島庚午北漢寇晉州  
守臣武守琦敗之於洪洞壬申吳越王敗江南軍於  
常州北界

八年春正月甲戌朔以出師不御殿丙子知池州樊  
若水敗江南軍於州界田欽祚敗江南軍於溧水斬  
其都統使李雄乙酉御長春殿謂宰相曰朕觀爲臣  
者比多不能有終豈忠孝薄而無以享厚福耶宰相  
居正等頓首謝庚寅曹彬拔昇州城南水砦三月癸  
丑彬敗江南軍於白鷺洲乙卯拔昇州關城丁巳太  
子中允徐昭文坐抑人售物除籍甲子知揚州侯陟  
敗江南軍於宣化鎮戊辰覆試進士於講武殿賜王  
嗣宗等三十一人諸科紀自成等三十四人及第三  
月乙酉賜王嗣宗等宴錢二十萬己丑命祈雨庚寅

彬敗江南軍於江中己亥契丹遣使克沁骨慎思以  
書來講和知潞州藥繼能拔北漢鷹澗堡辛丑召契  
丹使於講武殿觀習射壬寅遣內侍王繼恩領兵赴  
昇州大食國遣使來朝獻夏四月乙巳幸東水磴癸  
丑幸都亭驛閱新戰船丁巳吳越王拔常州壬戌彬  
等敗江南軍於秦淮北戊辰幸玉津園觀種稻遂幸  
講武池觀習水戰庚午詔嶺南盜賊滿十貫以上者  
死幸西水磴五月壬申朔以吳越國王錢俶守太師  
尚書令益食邑知桂陽監張侃發前官隱沒羨銀追  
罪兵部郎中董樞右贊善大夫孔璘殺之太子洗馬

趙瑜杖配海島侃受賞遷屯田員外郎辛巳祈晴甲申江南寧遠軍及沿江砦並降乙酉詔武岡長沙等十縣民爲賊鹵掠者蠲其逋租仍給復一年甲午安南都護丁璉遣使來貢六月壬寅曹彬等遣使言敗江南軍於其城下辛丑河決濮州丁未宋州觀察判官崔絢錄事參軍馬德休並坐賊棄市辛亥河決澶州頓丘甲子彗出柳長四丈辰見東方秋七月辛未朔日有食之庚辰遣閣門使郝崇信太常丞呂端使契丹癸未西天東印土王子穰結說囉來朝獻申申詔吳越王班師己亥山後兩林鬼主懷化將軍勿尼

等來朝獻八月乙卯辛東水碓觀魚遂幸北園辛酉  
詔權停今年貢舉壬戌契丹遣左衛大將軍耶律霸  
德等致御衣玉帶名馬西南蕃順化王子若廢等來  
獻名馬癸亥丁德裕敗潤州兵於城下九月壬申狩  
近郊逐兔馬蹶墜地因引佩刀刺馬殺之旣而悔之  
曰吾爲天下主輕事畋獵又何罪焉哉自是遂不復  
獵戊寅潤州降冬十月己亥朔江南主遣徐鉉周惟  
簡來乞緩師辛亥詔郡國令佐察民有孝悌力田奇  
材異行或文武可用者遣詣闕丁巳修西京宮闕江  
南主貢銀五萬兩絹五萬匹乞緩師戊午改潤州鎮

江軍節度爲鎮海軍節度韋晉王北園己未曹彬遣  
都虞候劉遇破江南軍於皖口擒其將朱令贇王暉  
十一月辛未江南主遣徐鉉等再奉表乞緩師不報  
甲申曹彬夜敗江南軍於城下丙戌以校書郎宋準  
殿直邢文慶充賀契丹正旦使乙未曹彬克昇州俘  
其國主煜江南平凡得州十九軍三縣一百八十戶  
六十五萬五千六十臨視新龍興寺十二月庚子幸  
惠民河觀築堰辛丑赦江南復一歲兵戈所經二歲  
戊申三佛齋遣使來獻方物己酉幸龍興寺辛亥免  
開封府諸縣今年秋租十之三己未以恩赦侯劉鋹

爲彭城郡公甲子契丹遣使耶律烏正來賀正旦丁卯吳越國王乞以長春節朝覲從之

九年春正月辛未御明德門見李煜于樓下不用獻俘儀壬申大赦減死罪一等乙亥封李煜爲違命侯子弟臣僚班爵有差己卯江南昭武軍節度使留後盧絳焚掠州縣庚辰詔郊西京癸巳晉王率文武上尊號不允二月癸卯三上表不允庚戌以曹彬爲樞密使辛亥命德昭迎勞吳越國王錢俶於宋州契丹遣使耶律延穎以御衣玉帶名馬散馬白鶻來賀長春節乙卯吳越王奏內客省使丁德裕貪狼貶房州

刺史丁巳觀禮賢宅戊午以廬多遜爲吏部侍郎仍  
參知政事己未吳越國王錢俶偕子惟濬等朝於崇  
德殿進銀絹以萬計賜俶衣帶鞍馬遂以禮賢宅居  
之宴於長安殿壬戌錢俶進賀平鼎州銀絹乳香吳  
綾紬綿錢茶犀象香藥皆億萬計甲子召晉王吳越  
國王并其子等射於苑中俶進御衣壽星通犀帶及  
金器丁卯幸禮賢宅賜俶金器及銀絹倍萬三月己  
巳俶進助南郊銀絹乳香以萬計庚午賜俶劍履上  
殿詔書不名癸酉以皇子德芳爲檢校太保貴州防  
禦使中書侍郎同平章事沈義倫爲大內都部署右



衛大將軍王仁贍權判留司三司兼知開封府事丙子幸西京己卯次鞏縣拜安陵號慟隕絕者久之庚辰賜河南府民今年田租之半奉陵戶復一年辛巳至洛陽庚寅大雨分命近臣詣諸祠廟祈晴辛卯幸廣化寺開無畏三藏塔夏四月己亥雨霽庚子有事圓丘迴御五鳳樓大赦十惡故殺者不原貶降責免者量移叙用諸流配及逋欠悉放諸官未贈恩者悉覃賞壬寅大宴賜親王近臣列校襲衣金帶鞍馬器幣有差丙午駕還辛亥上至自洛丁巳曹翰拔江州屠之擒牙校宋德明胡則等詔益晉王食邑光美德

昭並加開府儀同三司德芳益食邑薛居正沈義倫  
加光祿大夫樞密使曹彬宣徽北院使潘美加特進  
吳越國王錢俶益食邑內文武臣僚咸進階封己  
未著令旬假爲休浴丙寅大食國王珂黎拂遣使蒲  
希密來獻方物五月己巳幸東水磴遂幸飛龍院觀  
漁金水河甲戌遣司勳員外郎和峴往江南路採訪  
殺盧絳庚辰幸講武池遂幸玉津園觀稼宋州大風  
壞城樓官民舍幾五千間甲申以閣門副使田守奇  
等充賀契丹生辰使晉州以北漢嵐石憲三州巡檢  
使王洪武等來獻六月庚子步至晉王邸命作機輪

輓金水河注卹中爲池癸卯吳越王進銀絹綿以倍  
萬計乙卯熒惑入南斗秋七月戊辰幸晉王第觀新池  
丙子幸京兆尹光美第視疾戊寅再幸光美第泉州  
節度使陳洪進乞朝覲丙戌命近臣祈晴丁亥命修  
先代帝王及五嶽四瀆祠廟庚寅幸光美第八月乙  
未朔吳越國王進射火箭軍士已亥幸新龍興寺辛  
丑太子中允郭思齊坐賊棄市乙巳幸等覺院遂幸  
東染院賜工人錢又幸控鶴營觀習射賜帛有差又  
幸開寶寺觀藏經丁未遣侍衛馬軍都指揮使党進  
宣徽北院使潘美伐北漢丙辰遣使率兵分五道入

太原九月甲子幸綾錦院庚午權高麗國事王伯遣使來朝獻党進敗北漢軍於太原城北辛巳命忻代行營都監郭進遷山後諸州民庚寅幸城南池亭遂幸禮賢宅又幸晉王第冬十月甲午朔旦賜文武百官衣有差丁酉兵馬監押馬繼恩率兵入河東界焚蕩四十餘砦己亥幸西教場庚子鎮州巡檢郭進焚壽陽縣俘九千人辛丑晉隰巡檢穆彥璋入河東俘二千餘人党進敗北漢軍於太原城北己酉吳越王獻馴象癸丑夕帝崩於萬歲殿年五十殯于殿西階謚曰英武聖文神德皇帝廟號太祖太平興國二年

四月乙卯葬永昌陵大中祥符元年加上尊謚曰啓  
運立極英武睿文神德聖功至明大孝皇帝帝性孝  
友節儉質任自然不事矯飾受禪之初頗好微行或  
諫其輕出曰帝王之興自有天命周世宗見諸將方  
面大耳者皆殺之我終日侍側不能害也旣而微行  
愈數有諫輒語之曰有天命者任自爲之不汝禁也  
一日罷朝坐便殿不樂者久之左右請其故曰爾謂  
爲天子容易耶早作乘快誤決一事故不樂耳汴京  
新宮成御正殿坐令洞開諸門謂左右曰此如我心  
少有邪曲人皆見之吳越錢俶來朝自宰相以下咸

請留俶而取其地帝不聽遣俶歸國及辭取群臣留  
俶章䟽數十軸封識遺俶戒以途中密觀俶屈途啓  
視皆留己不遣之章也俶自是感懼江南平遂乞納  
土南漢劉鋹在其國好置醢以毒臣下旣歸朝從幸  
講武池帝酌卮酒賜鋹鋹疑有毒捧杯泣曰臣罪在  
不赦陛下旣待臣以不死願爲大梁布衣觀太平之  
盛未敢飲此酒帝笑而謂之曰朕推赤心於人腹中  
寧肯爾耶即取鋹酒自飲別酌以賜鋹王彥昇擅殺  
韓通雖預佐命終身不與節鉞王全斌入蜀貪恣殺  
降雖有大功即加貶絀宮中葦簾緣用青布常服之

衣澣濯至再魏國長公主襦飾翠羽戒勿復用又教之曰汝生長富貴當念惜福見孟景寶裝溺器椿而碎之曰汝以七寶飾此當以何器貯食所爲如是不亡何待晚好讀書嘗讀二典歎曰堯舜之罪四凶止從接竄何近代法網之密乎謂宰相曰五代諸侯跋扈有枉法殺人者朝廷置而不問人命至重姑息藩鎮當若是耶自今諸州決大辟錄案聞奏付刑部覆視之遂著爲令乾德改元先諭宰相曰年號須擇前代所未有者三年蜀平蜀宮人入內帝見其鏡背有志乾德四年鑄者召寶儀等詰之儀對曰此必蜀物

蜀主嘗有此號乃大喜曰作相須讀書人由是大重  
儒者受命杜太后傳位太宗太宗嘗病亟帝往視之  
親爲灼艾太宗覺痛帝亦取艾自灸每對近臣言太  
宗龍行虎步生時有異他日必爲太平天子福德吾  
所不及云

贊曰昔者堯舜以禪代湯武以征伐皆南面而有天  
下四聖人者徃世道升降否泰推移當斯民塗炭之  
秋皇天眷求民主亦惟責其濟斯世而已使其必得  
四聖人之才而後以行其事昇之則生民平治之期  
殆無日也五季亂極宋太祖起介冑之中踐九五之



位原其得國視晉漢周亦豈甚相絕哉及其發號施  
令名藩大將俯首聽命四方列國次第削平此非人  
力所易致也建隆以來釋藩鎮兵權繩賊吏重法以  
塞濁亂之源州郡司牧下至今錄幕職躬自引對務  
農興學慎罰薄斂與世休息迄於丕平治定功成制  
禮作樂在位十有七年之間而三百餘載之基傳之  
子孫世有典則遂使三代而降考論聲明文物之治  
道德仁義之風宋於漢唐蓋無讓焉烏虜創業垂統  
之君規模若是亦可謂遠也已矣

本紀卷第三

本紀卷第四

宋史四

開府儀同三司上柱國錄軍國重事前書右丞相兼樞密使領經筵事都統殿前司等奉

勅修

太宗一

太宗神功聖德文武皇帝諱炅初名匡乂改賜光義即位之二年改今諱宣祖第三子也母曰昭憲皇后杜氏初后夢神人捧日以授已而有娠遂生帝於浚儀官舍是夜赤光上騰如火間巷聞有異香時晉天福四年十月十七日甲辰也帝幼不群與他兒戲皆畏服及長隆準龍顏望之知為大人儼如也性嗜學

宣祖總兵淮南破州縣財物悉不取第求古書遺帝  
恒飭厲之帝由是工文業多藝能仕周至供奉官都  
知太祖即位以帝為殿前都虞候領睦州防禦使親  
征澤潞帝以大內點檢留鎮尋領泰寧軍節度使征  
李重進為大內都部署加同平章事行開封尹再加  
兼中書令征太原敗東都留守別賜門戟封晉王序  
班宰相上開寶九年冬十月癸丑太祖崩帝遂即皇  
帝位乙卯大赦常赦所不原者咸除之丙辰群臣表  
請聽政不許丁巳宰相薛居正等固請乃許即日移  
御長春殿庚申以弟廷美為開封尹兼中書令封齊

王先帝子德昭為永興軍節度使兼侍中封武功郡  
王德芳為山南西道節度使興元尹同平章事薛居  
正加左僕射沈倫加右僕射盧多遜為中書侍郎曹  
彬仍樞密使並同平章事楚昭輔為樞密使潘美為  
宣徽南院使內外官進秩有差詔茶鹽榷酤用開寶  
八年額十一月癸亥朔帝不視朝甲子追冊故尹氏  
為淑德皇后越國夫人符氏為懿德皇后戊辰罷州  
縣奉戶庚午詔諸道轉運使察州縣官吏能否第為  
三等歲終以聞命諸州大索知天文術數人送闕下  
匿者論死乙亥命權知高麗國事王佖為高麗國王

癸未幸相國寺己丑遣著作郎馮正佐郎張玘使契  
丹告哀詔文武官由譴累不齒者有司毋得更論前  
過十二月己亥置直舍人院甲寅御乾元殿受朝樂  
縣而不作大赦改是歲為太平興國元年命太祖子  
及齊王廷美子並稱皇子女並稱皇女丁巳置三司  
副使戊午契丹遣使來賻己未幸講武池遂幸玉津  
園庚申節度使趙普向拱張永德高懷德馮繼業張  
美劉廷讓來朝

二年春正月壬戌以大行殯不視朝丙寅禁居官出  
使者行商賈事戊辰親試禮部舉人甲戌上大行皇

帝謚曰英武聖文神德廟號太祖丙子幸相國寺還  
御東華門觀燈庚辰閱禮部貢士十舉至十五舉者  
百二十人並賜出身戊子命邕州廣源州酋長坦坦  
綽儂民富為檢校司空御史大夫上柱國辛卯幸講  
武池置江南榷茶場二月甲午契丹遣使來賀即位  
及正旦吳越國遣使來貢罷南唐鐵錢庚子帝改名  
炁壬寅大宴崇德殿不作樂乙巳幸新鑿池遂幸講  
武池宴射玉津園丁未占城國遣使來貢己酉令江  
南諸州鹽先通商處悉禁之戊午幸太平興國寺遂  
幸造船務還幸建隆觀三月壬戌朔始立試銜官選

限己卯以河陽節度使趙普為太子少保己丑幸開  
寶寺置威勝軍禁江南諸州銅許契丹互市夏四月  
辛卯大食國遣使來貢丁酉契丹遣使來會葬乙卯  
葬太祖于永昌陵五月壬戌河南法曹參軍高丕伊  
闕縣主簿翟隣鄭州滎澤令申廷溫坐不勤事並免  
癸亥向拱張永德張美劉廷讓皆罷節鎮為諸衛上  
將軍乙丑幸新水磴遂幸玉津園宴射丙寅詔繼母  
殺子及婦者同殺人論庚午宴崇德殿不作樂遣辛  
仲甫使契丹甲戌以十月十七日為乾明節己卯祔  
太祖神主于廟以孝明皇后王氏配又以懿德皇后

符氏淑德皇后尹氏祔別廟庚辰詔作北帝宮于終  
南山癸未幸新水磴遂宴射玉津園六月辛卯朔白  
龍見邠州要策池中乙卯幸開寶寺遂幸飛龍院賜  
從官馬是月磁州保安等縣墨蟲生食桑葉殆盡頴  
州大水秋七月庚午詔諸庫藏敢變權衡以取羨餘  
者死癸未鉅鹿沙河步蝨食桑麥河決滎澤頓丘白  
馬溫縣閏月己亥幸白鵲橋臨金水河己酉河溢開  
封等八縣害稼甲寅詔發潭州兵擊梅山洞賊丁巳  
有司上閏年輿地版籍之圖令支郡得專奏事八月  
癸亥黎州兩林蠻來貢乙丑平海軍節度使陳洪進



來朝癸酉以觀燈遂幸相國寺戊寅詔作崇聖殿是  
月陝澶道忠壽諸州大水鉅鹿步竈生景城縣雹九  
月乙未幸弓箭院遂幸新脩三館壬寅幸新水磴遂  
幸西御園宴射丁未渤尼國遣使來貢山後兩林蠻  
來獻馬辛亥幸講武臺大閱容州初貢珠乙卯鎮海  
鎮東軍節度使錢惟濬來朝丙辰狩近郊丁巳吳越  
王遣使乞呼名不允是月興州江水溢濮州大水汴  
水溢冬十月戊午朔賜百官及在外將校長吏冬服  
辛酉契丹來賀乾明節己巳幸京城西北觀衛士與  
契丹使騎射遂宴苑中己巳群臣請舉樂表三上從

之丙子詔禁天文卜相等書私習者斬辛巳畋近郊  
初榷酒酤十一月丁亥朔日有食之既庚寅日南至  
帝始受朝甲午遣李漬等賀契丹正旦丁酉禁江南  
諸州新小錢私鑄者棄市癸丑幸御龍弓箭直營賜  
軍士錢帛有差十二月丁巳朔試諸州所送天文術  
士隸司天臺無取者黥配海島庚午畋近郊癸酉詔  
定晉州鑿法私煮及私販易者罪有差辛巳幸新水  
磴高麗國王使其子元輔來賀即位

三年春正月丙戌朔不受朝群臣詣閣賀庚寅殿直  
霍瓊坐募兵劫民財腰斬甲午浚汾河雅州西山野

川路蠻來朝戊戌開襄漢漕渠渠成而水不上卒廢  
己亥光祿丞李之才坐擅入酒邀同列飲殿中除名  
庚子罷陳州蔡河舟筭辛丑浚廣濟惠民及蔡三河  
治黃河隄乙巳浚汴口己酉命脩太祖實錄辛亥命  
群臣禱雨癸丑京畿雨足二月丙辰幸鄭國公主第  
以三館新脩書院為崇文院丁巳詔班諸州錄事縣  
令簿尉曆子合書式甲子罷昌州七井虛額鹽丙寅  
泗州錄事參軍徐璧坐監倉受賄出虛券棄市辛未  
幸西綾錦院命近臣觀織室機杼還幸崇文院觀書  
詔鑿金明池甲申禁沿邊諸郡闌出銅錢製西京新

脩殿名三月乙酉朔貝州清河民田祚十世同居詔  
旌其門閭復其家辛丑監海門戍殿直武裕坐姦賍  
棄市壬寅秦州言戎酋王泥猪寇八狼戍巡檢劉崇  
讓擊敗之梟其首以徇己酉吳越國王錢俶來朝壬  
子幸開寶寺是月壽州甘露降夏四月乙卯朔命群  
臣禱雨召華山道士丁少微丙辰禁民自春及秋毋  
捕獵庚午幸建隆觀遂幸西染院又幸造船務乙亥  
置諸道轉運判官己卯陳洪進獻漳泉二州九得縣  
十四戶十五萬一千九百七十八兵萬八千七百二  
十七庚辰幸城南觀麥遂幸玉津園宴射辛巳侍御

史趙承嗣坐監市征隱官錢棄市癸未以陳洪進為  
武寧軍節度使同平章事錢俶乞罷所封吳越國王  
及解天下兵馬大元帥并寢書詔不名之命歸其兵  
甲求還不許是月河決獲嘉縣五月乙酉赦漳泉仍  
給復一年錢俶獻其兩浙諸州凡得州十三軍一縣  
八十六戶五十五萬六百八十兵一十一萬五千三  
十六丁亥封錢俶為淮海國王其子惟濬徙淮南軍  
節度使惟治徙鎮國軍節度使戊子赦兩浙給復如  
漳泉癸巳遣李從吉等使契丹乙未占城國遣使獻  
方物壬寅定難軍節度使李克勣卒子繼筠立乙巳

以繼筠襲定難軍節度使幸殿前都指揮使楊信第  
視疾戊申以秦州節度判官李若愚子飛雄矯制乘  
驛至清水縣縛都巡檢周承瑨及劉文裕馬知節等  
七人將劫守卒據城為叛文裕覺其詐禽縛飛雄按  
之盡得其狀詔誅飛雄及其父母妻子同產而哀若  
愚宗真無主申戒中外臣庶自今子弟有素懷凶險  
屢戒不悛者尊長聞諸州縣錮送闕下配隸遠處隱  
不以聞坐及期功以上六月戊午復給乘驛銀牌士  
午秦州清水監軍田仁朗擊破西羌斬獲甚衆癸未  
詔太平興國元年十月乙卯以來諸職官以贓致罪

者雖會赦不得叙永為定制是月泗州大水汴水決  
寧陵縣秋七月乙酉大雨震電西寇務藁聚焚壬辰  
右千牛衛上將軍李煜卒追封吳王戊戌金鄉縣民  
李光襲十世同居詔旌其門庚戌改明德門為丹鳳  
門壬子中書令史李知古坐受賕擅改刑部所定法  
杖殺之八月癸丑幸南造船務遂幸玉津園宴射滑  
州黃河清丙辰詔兩浙發淮海王總麻以上親及管  
內官吏赴闕辛未夷州蠻任朗政來貢癸酉詹事丞  
徐選坐贓杖殺之甲戌群臣請上尊號曰應運統天  
聖明文武皇帝許之九月甲申親試禮部舉人壬子

以布衣張遯為襄邑縣主簿張文旦濮陽縣主簿冬  
十月癸丑朔契丹遣使來賀乾明節高麗國王遣使  
來貢庚申幸武功郡王德昭邸遂幸齊王邸賜齊王  
銀萬兩絹萬匹德昭德芳有差辛酉復充州曲阜縣  
襲封文宣公家庚午畋近郊是月河決靈河縣十一  
月丙申祀天地于圜丘大赦御乾元殿受尊號庚子  
幸齊王邸丙午以郊祀中外文武加恩十二月乙丑  
幸講武臺觀機石連弩庚午畋近郊戊寅契丹遣使  
來賀正旦己卯置三司推官巡官

四年春正月丁亥命太子中允張洎著作佐郎句中



正使高麗告以北伐遣官分督諸州軍儲輸太原行營庚寅以宣徽南院使潘美為北路都招討制置使分命節度使河陽崔彥進彰德李漢瓊彰信劉遇桂州觀察使曹翰副以衛府將直四面進討侍衛馬軍都虞候米信步軍都虞候田重進並為行營指揮使將其軍以從西上閣門使郭守文順州團練使梁迥監護之辛卯命雲州觀察使郭進為太原石嶺關都部署以斷燕薊援師癸巳置簽署樞密院事以石熙載為之乙未宴潘美等于長春殿賜以襲衣金帶鞍馬癸卯新渾儀成二月壬子幸國子監遂幸玉津園

宴射甲寅以齊王廷美子德恭為貴州防禦使丙辰  
以中書侍郎尚書右僕射同平章事沈倫為東京留  
守兼判開封府事宣徽北院使王仁贍為大內都部  
署樞密承旨陳從信副之癸亥賜扈從近臣鞍馬衣  
服金玉帶有差甲子帝發京師戊寅次澶州觀魚于  
河三月庚辰朔次鎮州丁亥郭進破北漢西龍門砦  
禽獲甚衆乙未郭進大破契丹于關南庚子左飛龍  
使史業破北漢鷹揚軍俘百人來獻乙巳夏州李繼  
筠乞帥所部助討北漢詔泉州發兵護送陳洪進親  
屬赴關夏四月己酉朔嵐州行營與北漢軍戰破之

庚戌孟縣降以石熙載為樞密副使辛酉以孟玄喆  
劉廷翰為兵馬都鈐轄崔翰總馬步軍並注泊鎮州  
壬戌帝發鎮州折御卿克苛嵐軍獲其軍使折令圖  
乙丑克隆州獲其招討使李詢等六人己巳折御卿  
克嵐州殺其憲州刺史郭翊獲夔州節度使馬延忠  
庚午次太原駐蹕汾東行營辛未幸太原城詔諭北  
漢主劉繼元使降壬申夜帝幸城西督諸將發機石  
攻城甲戌幸諸砦乙亥幸連城視攻城諸洞五月己  
卯朔攻城西南遂陷羊馬城獲其宣徽使范超斬纛  
下辛巳攻城西北壬午其騎帥郭萬超來降遂移幸

城南手詔賜繼元癸未進攻將士盡奮若將屠之是  
夜繼元遣使納款甲申繼元降北漢平凡得州十縣  
四十戶三萬五千二百二十命祠部郎中劉保勛知  
太原府乙酉赦河東常赦所不原者命錄死事將校  
子孫廕戰士戊子以榆次縣為新并州優賞歸順將  
校盡括僧道隸西京寺觀官吏及高貲戶授田河南  
北漢節度使蔚進盧遂以汾州降己丑以繼元為右  
衛上將軍彭城郡公帝作平晉詩令從臣和辛卯繼  
元獻官妓百餘以賜將校乙未築新城送劉繼元總  
麻以上親赴關丙申幸城北御沙河門樓盡徙餘民

于新城遣使督之既出即命縱火丁酉以行宮為平  
晉寺帝作平晉記刻寺中廢隆州隳其城庚子發太  
原丁未次鎮州六月甲寅以將伐幽薊遣發京東河  
北諸州軍儲赴北面行營庚申帝復自將伐契丹丙  
寅次金臺頓募民為鄉導者百人丁卯次東易州刺  
史劉宇以城降留兵千人守之戊辰次涿州判官劉  
厚德以城降己巳次鹽溝頓民得近界馬來獻賜以  
束帛庚午次幽州城南駐蹕寶光寺契丹軍城北帝  
率衆擊走之壬申命節度使定國宋偓河陽崔彥進  
彰信劉遇定武孟玄喆四面分兵攻城以潘美知幽

州行府事契丹鐵林廂主李札盧存以所部來降癸酉移幸城北督諸將進兵獲馬三百幽州神武廳直并鄉兵四百人來降乙亥范陽民以牛酒犒師丁丑帝乘輦督攻城秋七月庚辰契丹建雄軍節度使知順州劉廷素來降壬午知薊州劉守恩來降癸未帝督諸軍及契丹大戰于高梁河敗績甲申班師庚寅命孟玄喆屯定州崔彥進屯關南乙巳帝至自范陽八月壬子西京留守石守信坐從征失律貶崇信軍節度使甲寅彰信軍節度使劉遇貶宿州觀察使癸亥命潘美屯河東三交口甲戌汴水決宋城縣武功

郡王德昭自殺詔作太清樓是月秦州大水九月己卯河決汲縣丁亥置皇子侍讀己亥幸新城觀鐵林軍人射强弩庚子華山道士丁少微詣闕獻金丹及巨勝南芝玄芝癸卯山後兩林蠻以名馬來獻丙午鎮州都鈐轄劉廷翰及契丹戰于遂城西大敗之斬首萬三百級獲三將馬萬匹冬十月乙亥以平北漢功齊王廷美進封秦王薛居正加司空沈倫加左僕射盧多遜兼兵部尚書曹彬兼侍中白進超崔翰劉廷翰田重進米信並領諸軍節度使楚昭輔崔彥進李漢瓊並加檢校太尉潘美加檢校太師王仁贍加

檢校太傅石熙載加刑部侍郎文武從臣進秩有差  
十一月庚辰放道士丁少微歸華山己丑畋近郊辛  
卯忻州言與契丹戰破之關南言破契丹斬首萬餘  
級十二月丁未占城國遣使來貢丁卯畋近郊置諸  
州司理判官

五年春正月庚辰詔宣慰河東諸州壬午新作天駟  
左右監以左右飛龍使為左右天廐使開廐使為崇  
儀使庚寅改端明殿學士為文明殿學士二月戊辰  
斬徐州妖賊李緒等七人廢順化軍三月戊子會親  
王宰相淮海國王及從臣蹴鞠大明殿己丑左監門



衛上將軍劉錕卒追封南越王癸巳代州言宣徽南  
院使潘美敗契丹之師于鴈門殺其駙馬侍中蕭咄  
李獲都指揮使李重誨閏三月丙午幸水磴因觀魚  
甲寅親試禮部舉人丁巳親試諸科舉人庚午幸講  
武池觀習樓船辛未甘沙州回鶻遣使以橐駝名馬  
來獻夏四月癸未親試應百篇舉趙昌國賜及第壅  
汾河晉祠水灌太原隰其故城是月壽州風雹寇氏  
縣雨雹五月癸卯朔大霖雨辛酉命宰相祈晴六月  
壬午高麗國王遣使來貢是月潁州大水徐州白溝  
溢入城秋七月丁未討交州黎桓命蘭州團練使孫

全興八作使張濬左監門衛將軍崔亮寧州刺史劉  
澄軍器庫副使賈湜閣門祗候王僕並為部署全興  
濬亮由邕州澄湜僕由廉州各以其衆致討庚申北  
海魴魴生八月甲申西南蕃主龍瓊琚使其子羅若  
從并諸州蠻來貢九月癸卯黎桓遣使為丁璿上表  
求襲位甲辰史館上太祖實錄壬戌畋近郊冬十月  
戊寅大發兵屯關南及鎮定州己丑發京師至雄州  
民治道甲午命侍衛馬軍都指揮使米信護定州屯  
兵十一月庚子朔安南靜海軍節度行軍司馬權知  
州事丁璿上表求襲位不報丙午以秦王廷美為東

京留守王仁贍為大內都部署陳從信副之己酉帝  
伐契丹壬子發京師癸丑次長垣縣關南與契丹戰  
大破之以河陽三城節度使崔彥進為關南都部署  
戊午駐蹕大名府諸軍及契丹大戰于莫州敗績十  
二月甲戌大閱遂宴幄殿衛士有盜獲麀者當坐詔  
特釋之戊寅以保靜軍節度使劉遇威塞軍節度使  
曹翰為幽州東西路部署庚辰發大名府因校獵乙  
酉帝至自大名府交州行營與賊戰大破之

六年春正月癸卯置平塞靜戎二軍辛亥易州破契  
丹數千衆丙寅改靜戎軍為安靜軍二月己卯命宰

臣禱雨三月己酉興元尹德芳薨追封岐王癸丑詔  
令諸路轉運使察官吏賢否以聞丙辰置破虜平戎  
二軍丁巳高昌國遣使來貢壬戌交州行營破賊于  
白藤江口獲戰艦二百艘知邕州侯仁貴死之會炎  
瘴軍士多死者轉運使許仲宣驛聞詔班師詔斬劉  
澄賈湜于軍中徵孫全興下獄令諸州長吏五日一  
慮囚夏四月辛未幸太平興國寺禱雨丙戌高麗國  
遣使來貢禁西川諸州白衣巫師罷湖州織羅放女  
工五月己未雨降死罪囚流以下釋之平塞軍與契  
丹戰破之六月甲戌司空平章事薛居正薨七月丙

午詔渤海琰府王助討契丹是月延州鄜寧河中大水宋州蝗九月乙未朔日有食之甲辰左拾遺田錫上疏極諫詔嘉獎之丙午置京朝官差遣院初令中書舍人郭贇等考校課績辛亥以趙普為司徒石熙載為樞密使壬子詔求直言丙辰易州言破契丹斬絳州妖賊王禧等十人冬十月癸酉群臣三奉表上尊號曰應運統天睿文英武大聖至明廣孝皇帝許之甲申以河陽三城節度使崔彥進為關南都部署侍衛馬軍都指揮使米信為定州都部署丙戌校歷代醫書甲午詔作蘇州太一宮成十一月丁酉監察

御史張白坐知蔡州日假官錢糴糶棄市甲辰改武  
德司為皇城司女真遣使來貢辛亥祀天地于圜丘  
大赦御乾元殿受尊號内外文武加恩壬子令諸州  
監臨官有所聞見傳聞湏面陳者俟報丁巳交州行  
營部署孫全興棄市辛酉以樞密使楚昭輔為左驍  
衛上將軍十二月癸酉購求醫書己卯畋近郊己丑  
諸道節度州置觀察支使奉料同掌書記仍不得並  
置辛卯禁民私市近界部落馬

七年春正月甲午朔不受朝群臣詣閣稱賀壬戌定  
輿服等差及婚取喪葬儀制二月甲申改關南為高

陽關徙并州治唐明鎮乙酉特貫廬州管內逋米萬  
七千二百四十石三月癸巳朔日有食之乙未以秦  
王廷美為西京留守乙巳以旱分遣中黃門徧禱方  
岳交州以王師致討遣使來謝士子賜秦王襲衣通  
犀帶錢十萬是月舒州上玄石有白文曰丙子年出  
趙號二十一帝宣州雪霜殺桑害稼北陽縣蝗飛鳥  
數萬食之盡夏四月甲子以樞密直學士竇偁中書  
舍人郭贍並叅知政事如京使柴禹錫為宣徽北院  
使兼樞密副使戊辰中書侍郎兼兵部尚書平章事  
盧多遜罷為兵部尚書丁丑西京留守秦王廷美罷

歸第復其子德恭德隆名皇姪女韓氏婦落皇女雲陽公主之號廬多遜褫職流崖州并徙其家晷周以上親悉配遠裔庚辰左僕射平章事沈倫罷為工部尚書禁河南諸州私鑄鉛錫惡錢及輕小錢是月閏州大水五月辛丑崔彥進敗契丹于唐興戊申慮囚己酉夏州留後李繼捧獻其銀夏綏宥四州辛亥三交行營言潘美敗契丹之師于鴈門破其壘三十六丙辰秦王廷美降封涪陵縣公房州安置以崇化副使閻彥進知房州監察御史袁廓通判軍州事各賜白金三百兩己未府州破契丹于新澤砦獲其將校



以下百人是月陝州蝗蕪湖縣雨雹六月乙亥遣使發李繼捧總麻已上親赴闕其弟繼遷奔地介澤丙子置譯經院是月河決臨濟縣漢陽軍大水秋七月甲午以子德崇為檢校太傅同平章事封衛王德明為檢校太保同平章事封廣平郡王乙卯工部尚書沈倫以左僕射致仕是月河決范濟口淮水漢水易水皆溢陽穀縣蝗關陝諸州大水八月庚申朔太子太師王溥薨己卯詔川峽諸州官織錦綺鹿胎透背六銖歌正龜殼等悉罷之民間勿禁九月己丑朔西京諸道係籍沙彌令祠部給牒甲寅貴妃孫氏薨

州蝗冬十月癸亥詔河南吏民不得闌出邊關侵撓  
略奪違者論罪有得羊馬生口者還之戊辰辛金明  
池御龍舟觀習水戰河決武德縣蠲臨河民租己卯  
左諫議大夫叅知政事實備卒癸卯乾元曆成是月  
岳州田鼠食稼十一月己酉以李繼捧為彰德軍節  
度使禁民喪葬作樂十二月戊午朔日有食之庚午  
蠲兩浙諸州太平興國六年前逋租戊寅高麗國  
王佖卒其弟治遣使求襲位詔立治為高麗國王閏  
月戊子朔豐州與契丹戰破之獲其天德軍節度使  
蕭太占城國獻馴象丙申狩近郊辛亥詔赦銀夏等

州常赦所不原者諸州置農師

八年春正月己卯以東上閤門使王顯為宣徽南院使酒坊使弭德超為北院使並兼樞密副使癸未詔令州縣長吏延問高年耆德二月戊子朔日有食之丁酉禁內屬部落私市女口三月庚申以右諫議大夫宋琪為叅知政事豐州破契丹兵降三千餘帳癸亥分三司各置使癸酉幸金明池觀習水戰丙子親試禮部舉人甲申除福建諸州鹽禁夏四月壬寅班外官戒諭辭壬子流樞密副使弭德超于瓊州并徙其家乙卯幸樞密使石熙載第視疾五月丁卯詔作

太一宮于都城南黎桓自稱三使留後遣使來貢并  
上丁璿讓表詔諭桓送璿母子赴闕不聽丁亥流威  
塞軍節度使曹翰于登州乙亥詔長吏誘致關隴流  
亡是月河決滑州過澶濮曹濟東南入于淮相州風  
雹六月己亥以王顯為樞密使柴禹錫為宣徽南院  
使兼樞密副使己酉兗州泰山父老及瑕丘等七縣  
民詣闕請封禪是月穀洛溼澗溢壞官民舍萬餘區  
溺死者以萬計鞏縣壞殆盡秋七月辛未叅知政事  
郭贄罷為祕書少監庚辰加宋琪刑部尚書以工部  
尚書李昉叅知政事是月河江漢潯沱及祁之資滄

之胡盧雄之易惡池水皆溢為患八月壬辰以大水  
故釋死罪以下丁酉山後兩林蠻來貢溪錦叙富四  
州蠻來附庚戌以樞密使石熙載為右僕射辛亥增  
謚法詔軍國政要令叅知政事李昉及樞密院副使  
一人錄送史館九月癸丑朔占城國獻馴象初置水  
陸路發運于京師是月睢溢浸田六十里冬十月戊  
戌改衛王德崇名元佐廣平郡王德明名元祐德昌  
名元休德嚴名元雋德和名元傑己酉進元佐為楚  
王元祐陳王封元休韓王元雋冀王元傑益王並檢  
校太保同平章事司徒兼侍中趙普罷為武勝軍節

度使十一月壬子朔以叅知政事宋琪李昉並平章  
事癸丑除川峽民祖父母父母在別籍異財棄市律  
已未太一宮成壬申以翰林學士李穆呂蒙正李至  
並叅知政事樞密直學士張齊賢王沔並同簽署樞  
密院事庚辰置侍讀官十二月壬午朔詔綬銀夏等  
州官吏招誘沒界外民歸業仍給復三年丁亥賜河  
北河東緣邊戍卒襦京城諸軍米淮海國王錢俶三  
上表乞解兵馬大元帥國王尚書中書令太師等官  
罷元帥名餘不許西人寇宥州巡檢使李詢擊走之  
是月醴泉縣水中草變為稻滑州河決

雍熙元年春正月壬子朔不受朝群臣詣閣拜表稱  
賀戊午右僕射石熙載薨壬戌購逸書丁卯涪陵縣  
公廷美薨追封涪陵王壬申蠲諸州民去年官所貸  
粟癸酉左諫議大夫叅知政事李穆卒三月丁巳滑  
州河決既塞帝作平河歌賜近臣蠲水所及州縣今  
年租癸未以涪陵王子德恭德隆為刺史壻韓崇業  
為靜難軍司馬是月甘露降太一宮庭夏四月乙酉  
泰山父老詣闕請封禪戊子群臣表請凡三上許之  
甲午幸金明池觀習水戰因幸講武臺觀射賜武士  
帛五月庚戌朔除江南鹽禁辛亥幸城南觀麥賜刈

者錢帛罷諸州農師壬子西州回鶻與波斯外道來  
貢丁丑乾元文明二殿災己卯以京官充堂後官六  
月丁亥詔求直言己丑遣使按察兩浙淮南西川廣  
南獄訟鎮安軍節度使守中書令石守信薨庚子令  
諸州長吏十日一慮囚壬寅詔罷封泰山甲辰禁邊  
臣境外種蒔秋七月壬子改乾元殿為朝元殿文明  
殿為文德殿丹鳳門為乾元門改匭院為登聞鼓院  
東延恩匭為崇仁檢院南招諫匭為思諫檢院西申  
寃匭為申明檢院北通玄匭為招賢檢院八月丁酉  
親祠太一宮壬寅河水溢是月淄州大水九月壬戌



群臣表三上尊號曰應運統天睿文英武大聖至仁  
明德廣孝皇帝不許宰相叩頭固請終不許丙寅幸  
並河新倉冬十月甲申賜華山隱士陳搏號希夷先  
生夏州言掩擊李繼遷獲其母妻俘千四百餘帳繼  
遷走壬辰禁布帛不中度者癸巳嵐州獻牝獸一角  
并瑞物六十三種圖付史館戊戌忠州錄事叅軍卜  
元幹坐受賕枉法杖殺之十一月壬子高麗國王遣  
使來貢丁巳祀天地于園丘大赦改元中外文武官  
進秩有差癸酉以浦城童子楊億為秘書省正字十  
二月庚辰淮海國王錢俶徙封漢南國王癸未賜京

幾高年帛丁亥罷嶺南採珠塲壬辰立德妃李氏為  
皇后丙申御乾元門賜京師大酺三日戊戌大雨雪

本紀卷第四



本紀卷第五

宋史五

開府儀同三司上柱國錄軍國軍事前書丞相監修國史領經筵事都總裁院院等奉勅修

太宗二

二年春正月丙辰以德恭為左武衛大將軍判濟州封定安侯德隆為右武衛大將軍判沂州封長寧侯右補闕劉蒙叟通判濟州起居舍人韓儉通判沂州乙丑賜德恭德隆常奉外支錢三百萬二月戊寅權交州留後黎桓遣使來貢乙未夏州李繼遷誘殺汝州團練使曹光實己亥占城遣使來貢三月己未親

試禮部舉人江南民饑許渡江自占夏四月乙亥朔遣使行江南諸州振饑民及察官吏能否戊寅遣忠武軍節度使潘美復屯三交口己卯詔以帝所生官舍作啓聖院己丑殿前承旨王著坐監資州兵為姦賊棄市庚子甘露降後苑辛丑夏州行營破西蕃息利族斬其代州刺史折羅遇并弟埋乞又破保洗兩族降五十餘族五月甲子幸城南觀麥賜田夫布帛天長軍蟪生六月甲戌朔河西行營言獲爰羅賦等十四族焚千餘帳戊子復禁鹽榷酤秋七月庚申詔諸道轉運使及長吏宜乘豐儲廩以防水旱八月癸

酉朔遣使按問兩浙荆湖福建江南東西路淮南諸  
州刑獄仍察官吏勤惰以聞癸巳西南奉化王子以  
慈來貢是月瀛莫二州大水九月丙午以歲無兵凶  
除十惡官吏犯贓謀故劫殺外死罪減降流以下釋  
之及蠲江浙諸州民逋租庚戌重九賜近臣飲于李  
昉第召諸王節度使宴射苑中是夕楚王宮火辛亥  
廢楚王元佐為庶人均州安置丁巳群臣請留元佐  
養疾京師許之己未西南蕃王遣使來貢己巳禁海  
賈閏月癸未太白入南斗甲申幸天馬監賜從臣馬  
乙未禁邕管殺人祭鬼及僧人置妻孥己亥均州獻

一角獸冬十月辛丑朔慮囚丙午以天竺僧天息災  
施護法天並為朝請大夫試鴻臚少卿己酉汴河主  
糧胥吏坐奪漕軍口糧斷腕徇于河畔三日斬之甲  
寅黎邛部蠻王子來貢十一月壬午狩于近郊以所  
獲獻太廟著為令戊子禱雪辛卯詔在官丁父母憂  
者並放離任十二月庚子朔日有食之癸卯南康軍  
言雪降三尺大江冰合可勝重載丁未遣中使賜緣  
邊戍卒襦袴丙辰門下侍郎兼刑部尚書平章事宋  
琪罷守本官

三年春正月辛未右武衛大將軍長寧侯德隆薨以

其弟德彝嗣侯仍知沂州庚辰夜漏一刻北方有赤  
氣如城至明不散己丑知雄州賀令圖等請伐契丹  
取燕薊故地庚寅北伐以天平軍節度使曹彬為幽  
州道行營前軍馬步水陸都部署河陽三城節度使  
崔彥進副之侍衛馬軍都指揮使彰化軍節度使米  
信為西北道都部署沙州觀察使杜彥圭副之以其  
衆出雄州侍衛步軍都指揮使靜難軍節度使田重  
進為定州路都部署出飛狐戌戍叅知政事李至罷  
為禮部侍郎二月壬子以檢校太師忠武軍節度使  
潘美為雲應朔等州都部署雲州觀察使楊業副之



出鴈門三月癸酉曹彬與契丹兵戰固安南克其城  
丁丑田重進戰飛狐北又破之潘美自西陲入與契  
丹兵遇追至寰州破之其刺史趙彥辛以城降辛巳  
曹彬克涿州潘美圍朔州其節度副使趙希贊以城  
降癸未田重進戰飛狐北獲其西南面招安使大鵬  
翼康州刺史馬頤馬軍指揮使何萬通乙酉曹彬敗  
契丹于涿州南殺其相賀斯丁亥潘美師至應州其  
節度副使艾正觀察判官宋雄以城降司門員外郎  
王延範與秘書丞陸坦戎城縣主簿田辯術士劉昂  
坐謀不軌棄市庚寅武寧軍節度使同平章事岐國

公陳洪進卒辛卯田重進攻飛狐其守將呂行德張繼從劉知進等舉城降以其縣為飛狐軍占城國遣使來貢丙申進圍靈丘其守將穆超以城降夏四月辛丑潘美克雲州田重進戰飛狐北破其衆壬寅曹彬米信戰新城東北又破之己酉田重進再戰飛狐北再破之殺二將乙卯重進至蔚州其牙校李存璋許彥欽殺大將蕭嘏理執其監城使同州節度使耿紹忠以城降五月庚午曹彬之師大敗于岐溝關收衆夜渡拒馬河退屯易州知幽州行府事劉保勲死之丙子召曹彬崔彥進米信歸闕命田重進屯定州

潘美還代州徙雲應寰朔吏民及吐渾部族分置河  
東京西會契丹十萬衆復陷寰州楊業護送遷民遇  
之苦戰力盡為所禽守節而死六月戊戌朔日有食  
之甲辰以御史中丞辛仲甫為叅知政事秋七月庚  
午敗曹彬為右驍衛上將軍崔彥進為右武衛上將  
軍米信為右屯衛上將軍杜彥圭為均州團練使應  
群臣列校死事及陷敵者錄其子孫壬午徙山後降  
民至河南府許汝等州丁亥以簽署樞密院事張齊  
賢為給事中知代州癸巳階州福津縣有大山飛來  
自龍帝峽壅江水逆流壞民田數百里甲午詔改陳

王元祐為元僖韓王元休為元侃冀王元雋為元份  
八月丁酉朔以王沔張宏並為樞密副使丁未大雨  
遣使禱岳瀆至夕雨止劔州民饑遣使振之因督捕  
諸州盜賊辛亥降潘美為檢校太保贈楊業太尉大  
同軍節度使九月丙寅朔減兩京諸州繫囚流以下  
一等杖罪釋之賜所徙寰應蔚等州民米并宣等十  
四州雍熙二年官所振貸並蠲之戊寅賜北征軍士  
陣亡者家三月糧冬十月甲辰以陳王元僖為開封  
尹壬子高麗國王遣使來貢庚申詔以權靜海軍留  
後黎桓為本軍節度十一月丙戌幸建隆觀相國寺

析雪十二月乙未朔大雨雪宴群臣玉華殿己亥定  
州田重進入契丹界攻下岐溝關壬寅契丹敗劉廷  
讓軍於君子館執先鋒將賀令圖高陽關部署楊重  
進死之壬子建房州為保康軍以右衛上將軍劉繼  
元為節度使代州副部署盧漢贇敗契丹于土鐙堡  
斬獲甚衆殺監軍舍利二人是歲壽州大水濮州蝗  
四年春正月甲子朔不受朝群臣詣閭拜表稱賀己  
卯遣使按問西川嶺南江浙等路刑獄丙戌詔應行  
營將士戰敗潰散者並釋不問緣邊城堡備禦有勞  
可紀者所在以聞瘞暴骸死事者廩給其家錄死事

文武官子孫蠲河北雍熙三年以前逋租敵所蹂踐者給復三年軍所過二年餘一年二月丙申以漢南國王錢俶為武勝軍節度使徙封南陽國王丁酉繕治河北諸州軍城隍甲寅錢俶改封許王三月庚辰詔申嚴考績夏四月癸巳朔以御史中丞趙昌言為右諫議大夫樞密副使乙未詔諸州郡暑月五日一滌囹圄給飲漿病者令醫治小罪即決之丁未幸金明池觀水嬉遂習射瓊林苑登樓擲金錢繒綵於樓下縱民取之併水陸發運為一司五月丙寅遣使市諸道民馬庚辰改殿前司日騎為捧日驍猛為拱辰

雄勇為神勇上鐵林為殿前司虎翼腰弩為神射侍衛步軍司鐵林為侍衛司虎翼丁亥詔諸州送醫術人校業太醫署賜諸將陣圖六月丁酉以右驍衛上將軍劉廷讓為雄州都部署戊戌以彰國軍節度使駙馬都尉王承衍為貝冀都部署郭守文及郢州團練使田欽祚並為北面排陣使庚子定國軍節度使崔翰復為高陽關兵馬都部署是月鄜州獻馬前足如牛秋七月丙寅幸講武池觀魚是月置三班院八月庚子免諸州吏所逋京倉米二十六萬七千石九月癸亥校醫術人優者為翰林學生冬十月丙午流

雄州都部署劉廷讓于商州壬子左僕射致仕沈倫薨十一月庚辰詔以實數給百官奉十二月壬寅幸建隆觀相國寺祈雪庚戌畋近郊丁巳大雨雪

端拱元年春正月己未朔不受朝群臣詣閣拜表稱賀乙亥親耕籍田還御丹鳳樓大赦改元除十惡官吏犯贓至殺人者不赦外民年七十以上賜爵一級癸未幸玉津園習射乙酉禁用酷刑是月澶州黃河清二月乙未改左右補闕為左右司諫左右拾遺為左右正言丙申禁諸州獻珍禽奇獸己亥詔瀛州民為敵所侵暴者賜三年租復其役五年庚子以籍田



開封尹陳王元僖進封許王元侃襄王元份越王錢  
俶鄧王中書門下平章事李昉為尚書右僕射參知  
政事呂蒙正同中書門下平章事樞密使王顯加檢  
校太傅給事中許國公趙普守太保兼侍中參知政  
事辛仲甫加戶部侍郎樞密副使趙昌言加工部侍  
郎樞密副使王沔為參知政事御史中丞張宏為樞  
密副使餘內外並加恩甲辰升建州為建寧軍節度  
庚戌以子元偓為左衛上將軍徐國公元偁為右衛  
上將軍涇國公三月甲戌貶樞密副使趙昌言為崇  
信軍行軍司馬乙亥鄭州團練使侯莫陳利用坐不

法配商州禁錮尋賜死癸未幸玉津園習射廢水陸  
發運司夏四月丁亥賜京城高年帛己丑加高麗國  
王洽靜海軍節度使黎桓並檢校太尉五月辛酉置  
秘閣于崇文院辛未感德軍節度使李繼捧賜姓趙  
氏名保忠壬申以保忠為定難軍節度使閏五月辛  
卯以洛州防禦使劉福為高陽關兵馬都部署濮州  
防禦使楊贊為貝州兵馬都部署乙未賜諸州高年  
爵公士丁酉交州黎桓遣使來貢壬寅親試禮部進  
士及下第舉人六月丙辰朔右領軍衛大將軍陳廷  
山謀反伏誅丁丑改湖南節度為武安軍節度親試

進士諸科舉人秋七月丙午除西川諸州鹽禁辛亥  
忠武軍節度使潘美知鎮州八月乙卯壽星見丙地  
甲子以宣徽南院使郭守文為鎮州路都部署戊寅  
太師鄧王錢俶薨追封秦國王謚忠懿庚辰幸太學  
命博士李覺講易賜帛遂幸玉津園習射是月鳳凰  
集廣州清遠縣解合歡樹樹下生芝三莖九月乙酉  
朔以待衛馬軍都指揮使李繼隆為定州都部署冬  
十月壬午以待衛步軍都指揮使戴興為澶州都部  
署癸未詔罷游獵五方所畜鷹犬並放之諸州毋以  
為獻十一月甲申朔高麗王遣使來貢己丑郭守文

破契丹于唐河十二月辛未以夏州蕃落使李繼遷為銀州刺史充洛苑使

二年春正月癸未朔不受朝群臣詣閤拜表稱賀壬辰以涪州觀察使柴禹錫為澶州兵馬部署癸巳詔議北伐二月壬子朔令河北東西路招置營田癸丑詔錄將校官吏功及死事使臣官吏子孫士卒廩給其家三月平塞天威平定威虜靜戎保塞寧邊等軍祁易保定鎮邢趙等州民除雍熙四年正月丙戌詔給復外更給復二年霸代洛雄莫深等州平虜等嵐軍更給復一年戊午罷乘傳銀牌復給樞密院牒以

太倉粟貸京畿饑民癸亥作方田戊辰以國子監為  
國子學三月辛卯命高瓊為并代都部署壬寅親試  
禮部舉人夏四月丁巳置富順監辛未幸趙普第視  
疾五月戊戌以旱慮囚遣使決諸道獄是夕雨秋七  
月甲申以知代州張齊賢為刑部侍郎樞密副使鹽  
鐵使張遜為宣徽北院使簽署樞密院事戊子有彗  
出東井上避正殿減常膳辛丑契丹犯威虜軍崇儀  
使尹繼倫擊破之殺其相皮室大將于越遜去八月  
丙辰大赦是夕彗不見癸亥詔作開寶寺舍利塔成  
九月壬午邛部川山後百蠻來貢冬十月辛未以定

難軍節度使趙保忠同平章事以歲旱彗星謫見詔  
曰朕以身為犧牲焚於烈火亦未足以荅謝天譴當  
與卿等審刑政之闕失稼穡之艱難恤物安人以祈  
玄祐十二月辛亥置三司都磨勘官丙辰大雨雪庚  
申詔令四方所上表紙稱皇帝群臣請復尊號不許  
辛酉上法天崇道文武皇帝詔去文武二字餘許之  
三佛齊國遣使來貢

淳化元年春正月戊寅朔減京畿繫囚流罪以下一  
等改元内外文武官並加勲階爵邑中書舍人大將  
軍以上各賜一子官賜鰥寡孤獨錢除逋負受尊號

改乾明節為壽寧節戊子詔作清心殿二月丁未朔  
除江南兩浙淮西嶺南諸州漁禁已酉改大明殿為  
含光殿三月丙子朔乙未幸西京留守趙普第視疾  
夏四月庚戌遣中使詣五嶽禱雨慮囚遣使分決諸  
道獄甲寅詔尚書省四品兩省五品以上舉轉運使  
及知州通判五溪蠻田漢權來附戊午建婺州為保  
寧軍節度丙寅命殿前副都指揮使戴興為鎮州都  
部署五月甲午給致仕官半奉辛卯置詳覆推勘官  
六月丙午罷中元下元張燈庚午太白晝見秋七月  
丁丑太白復見是月吉洪江蘄河陽隴城大水開封

陳留封丘酸棗鄆陵早賜今年田租之半開封特給  
復一年京師貴糴遣使開廩減價分糴八月乙巳毀  
左藏庫金銀器皿己巳禁川峽嶺南湖南殺人祀鬼  
州縣察捕募告者賞之庚午西南蕃主使其子龍漢  
興來貢是月京兆長安八縣旱賜今年租十之六蠲  
舒州宿松等三處魚池稅九月辛巳熒惑入太微垣  
大宴崇政殿禁川峽民父母在出為贅壻是月蠲滄  
單汝三州今年租十之六冬十月甲辰交州黎桓遣  
使來貢乙巳熒惑陵左執法乙丑知白州蔣元振知  
須城縣姚益恭並以清幹聞下詔褒諭賜粟帛是月



以乾鄭二州河南壽安等十四縣旱州蠲今年租十  
之四縣蠲其稅十一月戊戌太白晝見是月蠲大名  
府管內今年租十之七十二月乙巳占城遣使來貢  
乙卯高麗國遣使來貢辛酉詔中外所上書疏及面  
奏制可者並下中書樞密三司中覆頒行是歲洪吉  
江蘄諸州水河陽大水曹單二州有蝗不為災開封  
大名管內及許滄單汝乾鄭等州壽安長安天興等  
二十七縣旱深冀二州文登牟平兩縣饑

二年春正月壬申朔不受朝群臣詣閤拜表稱賀丙子遣  
商州團練使翟守素帥兵援趙保忠于夏州乙酉置內殿

崇班左右侍禁改殿前承旨為三班奉職丙戌熒惑  
犯房己丑詔陝西諸州長吏設法招誘流亡復業者  
計口貸粟仍給復二年二月癸丑盡易宮殿彩繪以  
赭堊監察御史祖吉坐知晉州日為姦賊棄市乙丑  
斬夔州亂卒謝榮等百餘人於市閏月辛未朔日有  
食之戊寅禱雨丁亥詔內外諸軍除木槍弓弩矢外  
不得蓄他兵器己丑詔京城蒲博者開封府捕之犯  
者斬命近臣兼差遣院流內銓是月河水溢鄆城縣  
蝗汴河決三月乙卯幸金明池御龍舟遂幸瓊林苑  
宴射己巳以歲蝗旱禱雨弗應手詔宰相呂蒙正等

朕將自焚以答天譴翌日而雨蝗盡死夏四月庚午  
罷端州貢硯辛巳以張齊賢陳恕並參知政事張遜  
兼樞密副使溫仲舒寇準並為樞密副使是月河水  
溢真鄉等七縣民饑五月己亥朔詔減兩京諸州繫  
囚流以下一等杖罪釋之庚子置諸路提點刑獄官  
丙辰左正言謝泌以敢言擢右司諫賜金紫錢三十  
萬六月甲戌忠武軍節度使同平章事潘美卒命張  
永德為并代都部署乙酉以汴水決浚儀縣帝親督  
衛士塞之庚寅禁陝西緣邊諸州闌出生口是月楚  
丘鄆城淄川三縣蝗河水汴水溢秋七月己亥詔陝

西緣邊諸州饑民鬻男女入近界部落者官贖之李  
繼遷奉表請降以為銀州觀察使賜國姓改名保吉  
是月乾寧軍蝗許雄嘉三州大水八月己卯置審刑  
院己丑雅州言登遼山崩九月丁酉朔戶部侍郎參  
知政事王沔給事中參知政事陳恕並罷守本官己  
亥中書侍郎兼戶部尚書平章事呂蒙正罷為吏部  
尚書以右僕射李昉參知政事張齊賢並平章事翰  
林學士賈黃中李沆並為給事中參知政事帝飛白  
書玉堂之署四字以賜翰林承旨蘇易簡壬寅印部  
川蠻來貢癸卯罷樞密使王顯為崇信軍節度使甲

辰以張遜知樞密院事溫仲舒寇準同知院事十一月丙申朔復百官次對乙巳罷京城內外力役土功己酉幸建隆觀相國寺祈雪十二月丙寅朔行入閣儀乙亥賜秦州童子譚孺卿本科出身癸未保康軍節度使劉繼元卒追封彭城郡王大兩無冰是歲女貞表請伐契丹詔不許自是遂屬契丹大名河中絳濮陝曹濟同淄單德徐晉輝磁博汝充號汾鄭毫慶許齊濱棣沂貝衛青霸等州旱

三年春正月癸卯大雨雪乙巳詔常參官舉可任升朝官者丙午詔宰相侍從舉可任轉運使者二月乙

丑朔日有食之三月乙未朔以趙普為太師封魏國  
公戊戌親試禮部舉人辛丑親試諸科舉人戊午以  
高麗賓貢進士四十人並為秘書省秘書郎遣還庚  
申帝幸金明池觀水戲縱京城觀者賜高年白金器  
皿夏四月丁丑詔江南兩浙荆湖吏民之配嶺南者  
還本郡禁錮癸未上作刑政稼穡詩賜近臣五月甲  
午朔御文德殿百官入閣壬寅詔御史府所斷徒罪  
以上獄具令尚書丞郎兩省給舍一人慮問丁未戶  
部郎中田錫通判殿中丞郭渭坐稽留刑獄並責州  
團練副使不簽署州事戊申詔太醫署良醫視京城

病者賜錢五十萬具藥中黃門一人按視之己酉以  
旱遣使分行諸路決獄是夕雨辛亥置理檢司甲寅  
詔作秘閣六月丁丑大風晝晦京師疫解戊寅慮囚  
甲申飛蝗自東北來蔽天經西南而去是夕大雨蝗  
盡死庚寅以殿前都虞候王昭遠為并代兵馬都部  
署辛卯置常平倉秋七月己酉太師魏國公趙普薨  
追封真定王是月許汝兗單滄蔡齊貝八州蝗洛水  
溢八月戊辰以秘閣成賜近臣宴壬申召終南山隱  
士种放不至庚辰閭婆國遣使來貢丁丑釋嶺南東  
西路罰作荷校者九月丙申遣官祈晴京城諸寺觀

甲寅幸天駟監賜從臣馬乙卯群臣上尊號曰法天  
崇道明聖仁孝文武皇帝凡五表終不許冬十月辛  
酉朔折御卿進白花鷹放之詔勿復獻戊寅始置京  
朝幕職州縣官考課并校三班殿最戊子高麗西南  
蕃皆遣使來貢十一月己亥許王元僖薨甲申慮囚  
降徒流以下一等釋杖罪趙保忠貢鶻號海東青還  
之己未禁兩浙諸州巫師置三司主轄收支官是月  
蔡州建安大火十二月丁卯大雨雪己卯占城國王  
楊陀排遣使來貢是月雄州言大火是歲潤州丹徒  
縣饑死者三百戶



四年春正月庚寅朔享太室群臣詣齊宮拜表稱賀  
辛卯祀天地于園丘以宣祖太祖配大赦乙未大雨  
雪高麗國遣使來貢乙巳藏才西族首領羅妹以良  
馬來獻二月己未朔日有食之壬戌召賜京城高年  
帛百歲者一人加賜塗金帶是日雨雪大寒再遣中  
使賜孤老貧窮人千錢米炭置昭宣使癸亥廢沿江  
榷貨八務乙丑加高麗國王王治檢校太師靜海軍  
節度使黎桓封交趾郡王己卯詔以江浙淮陝饑遣  
使巡撫詔分遣近臣巡撫諸道有可惠民者得便宜  
行事吏罷軟苛刻者上之詔令有未便者附傳以聞

丙戌置審官院考課院永康軍青城縣民王小波聚  
徒為寇殺眉州彭山縣令齊元振是月商州大雨雪  
三月壬子詔權停貢舉四月己卯諸司奉行公事不  
得輒稱聖旨五月戊申罷鹽鐵戶部度支等使置三  
司使六月戊午朔詔中丞已下皆親臨鞠獄丙寅吏  
部侍郎平章事張齊賢罷為尚書左丞壬申宣徽北  
院使知樞密院事張遜貶右領軍衛將軍右諫議大  
夫同知院事寇準罷守本官以涪州觀察使柴禹錫  
為宣徽北院使知樞密院事樞密直學士呂端參知  
政事劉昌言同知樞密院事戊寅初復給事中封駁

七月丁酉大雨戊戌復沿江務置諸路茶鹽制置使  
八月丙辰朔日有食之癸酉以向敏中張詠始同知  
銀臺通進司視章奏案牘以稽出入九月丙申詔諸  
雜除禁錮人州縣有闕得次補以責效能自新勤幹  
者具聞再叙乙巳以給事中封駁隸銀臺通進司丙  
午命侍從舉任才堪五千戶以上縣令者二人自七  
月雨至是不止是月河水溢壞澶州江溢陷涪州詔  
溺死者給斂具澶人千錢涪人鐵錢三千仍發廩以  
振冬十月壬戌罷諸路提點刑獄司庚午始分天下  
州縣為十道兩京為左右計各署判官領之置三司

使二員辛未右僕射平章事李昉給事中參知政事  
賈黃中李沆左諫議大夫知樞密院事溫仲舒並罷  
守本官以吏部尚書呂蒙正平章事翰林學士蘇易  
簡為給事中參知政事樞密都承旨趙鎔為宣徽北  
院使樞密直學士向敏中為右諫議大夫並同知樞  
密院事丁丑以右諫議大夫趙昌言為給事中參知  
政事辛巳遣使按行畿縣民田被水者蠲其租是月  
河決澶州西北流入御河閏月辛卯幸水碓觀魚已  
酉置三司總計度使十一月丁巳萬安州獻六眸龜  
癸酉還隴西州所獻白鷹十二月辛丑大雨雪戊申

三百六十八  
西川都巡檢使張玘與王小波戰江原縣死之小波  
中流矢死衆推其黨李順為帥

五年春正月甲寅朔不受朝群臣詣閣拜表稱賀戊  
午李順陷漢州己未陷彭州乙丑慮囚流罪以下釋  
之己巳李順陷成都知府郭載奔梓州順入據之賊  
兵四出攻劫州縣遣使振宋毫陳潁州饑民別遣決  
諸路刑獄應因饑劫藏粟誅為首者餘咸死癸酉以  
侍衛馬軍都指揮使李繼隆為河西行營都部署討  
李繼遷甲戌命昭宣使王繼恩為兩川招安使討李  
順詔諸州能出粟貸饑民者賜爵辛巳詔除兩京諸

州淳化三年通負二月乙未李順分攻劔州都監西  
京作坊副使上官正成都監軍供奉官宿翰合擊大  
破之斬馘殆盡丙午幸南御莊觀稼己酉以益王元  
傑為淮南鎮江等軍節度使徙封吳王辛亥詔除劔  
南東西川峽路諸州主吏民卒淳化五年以前通負  
三月乙亥趙保忠為趙保吉所襲奔還夏州指揮使  
趙光嗣執之以獻李繼隆帥師入夏州交趾郡王黎  
桓遣使來貢夏四月壬午朔詔除天下主吏通負甲  
申削趙保吉所賜姓名丙戌置起居院初復起居注  
以國子學復為國子監辛卯慮囚大食國王遣使來

貢戊戌赦諸州除十惡故刼殺官吏犯正賊外降死  
罪以下囚己亥王繼恩帥師過綿州賊潰走追殺及  
溺死者甚衆庚子復綿州內殿崇班曹習破賊于老  
溪復閬州綿州巡檢使胡正遠帥兵進擊復巴州壬  
寅西川行營擊賊于研口砦破之復劔州癸卯大雨  
五月丁巳西川行營破賊十萬衆斬首三萬級復成  
都獲賊李順其黨張餘復攻陷嘉戎瀘渝涪忠萬開  
八州關州監軍秦傳序死之丙寅河西行營送趙保  
忠至闕下釋其罪授右千牛衛上將軍封宥罪侯己  
巳以知梓州張雍都巡檢使盧斌嘗堅守却賊斌進

擊解閬州圍遂平蓬州雍加給事中斌領成州刺史  
以少府監雷有終為諫議大夫知成都府庚午賊攻  
夔州峽路都大巡檢白繼贊夔州巡檢使解守顥大  
敗其衆于西津口斬首二萬級獲舟千餘艘辛未降  
成都府為益州壬申右僕射李昉以司空致仕甲戌  
詔利州興元府洋州西縣民並給復一年丙子磔李  
順黨八人于鳳翔市庚辰初伏帝親書綾扇賜近臣  
六月辛卯詔赦李順脅從註誤是月都城大疫分遣  
醫官煮藥給病者賊攻施州指揮使黃希遜擊走之  
戊戌陝路行營破賊于廣安軍又破賊張罕二萬衆



于嘉陵江口又破于合州西方溪俘斬甚衆戊申以  
侍衛步軍都指揮使高瓊為鎮州都部署賊攻陵州  
知州張旦擊破之高麗遣使以契丹來侵乞師秋七  
月辛亥朔賊攻眉州知州李簡等堅守踰月賊引去  
癸亥置江淮兩浙發運使丙寅除兩浙諸州民錢俶  
日逋負甲戌置威塞軍乙亥李繼遷遣使來貢八月  
甲申詔有司講求大射儀注癸巳以內班為黃門甲  
午置宣政使以宦者昭宣使王繼恩為之乙未詔釋  
劔南峽路諸州亡命戌戌以通遠軍復為環州置清  
遠軍庚子大雨貝州言驍捷卒劫庫兵為亂推都虞

候趙成雍為帥轉運使王嗣宗率屯兵擊敗之擒咸雍磔于市辛丑詔遣知益州張詠赴部得便宜從事癸卯以參知政事趙昌言為西川峽路招安馬步軍都部署尋詔昌言駐鳳翔遣內侍押班衛紹欽往行營指揮軍事峽路行營破賊帥張餘復雲安軍李繼遷使其弟奉表待罪九月庚戌朔戶部尚書辛仲甫以太子少保致仕甲寅賜三司錢百萬募能言司事之利便者量事賞之盡則再給以備賞己未罷諸州榷酤改黃門院為內侍省以黃門班院為內侍省內侍班院入內黃門班院為內侍省入內侍班院辛酉

遣使分行宋毫陳穎泗壽鄧蔡等州按行民田被水及種蒔不及者並蠲其租壬申以襄王元侃為開封尹改封壽王大赦除十惡故謀劫鬪殺官吏犯正脏外諸官先犯脏罪配隸禁錮者放還乙亥以左諫議大夫寇準參知政事丁丑以蜀部漸平下詔罪已戊寅西川行營言衛紹欽破賊于學射山別將楊瓊復蜀州曹習等又破賊于安國鎮誅其帥馬太保冬十月庚辰詔釋殿前司逃軍親屬之禁錮者西川行營指揮使張嶠殺其將王文壽以叛遣使招撫其衆遂共斬嶠首以降乙未楊瓊等復邛州乙巳改青州平

盧軍為鎮海軍杭州鎮海軍為寧海軍十一月庚戌  
遣使諭李繼遷賜以器幣茶藥衣服丙辰賜近臣飛  
白書庚申詔江南西路及荆湖南北路嶺南溪洞接  
連及蕃商外國使誘子女出境者捕之癸亥賊攻眉  
州崇儀使宿翰等擊敗之斬其僞中書令吳蘊丙寅  
幸國子監賜直講孫奭緋魚因幸武成王廟復幸國  
子監令奭講尚書賜以束帛大寒賜禁衛諸軍緡錢  
有差十二月戊寅朔日當食雲陰不見辛巳命樞密  
直學士張鑑西京作坊副使馮守規安撫西川丙戌  
命諸王畋近郊弛忠靖二州刑徒庚寅宿翰等引兵

趨嘉州僞知州王文操以城降乙未祕書丞張樞坐  
知榮州降賊棄市辛丑以三司兩京十道復歸三部  
各置使一員每部置判官推官都監分勾院為三  
至道元年正月戊申朔改元赦京畿繫囚流罪以下  
逋降一等杖罪釋之蠲諸州逋租蠲陝西諸州去年  
秋稅之半丙辰詔作上清宮成丁巳涼州吐蕃當尊  
以良馬來獻戊午占城國王楊陀排遣使來貢辛酉  
上御乾元門觀燈癸亥契丹大將韓德威誘党項勒  
浪龜族自振武犯邊永安節度使折御卿邀擊敗之  
于子河汭勒浪等乘亂反擊德威遂殺其將突厥大

尉司徒舍利等獲吐渾首領一人德威僅以身免戊辰以翰林學士錢若水為右諫議大夫同知樞密院事樞密副使劉昌言罷為給事中以宣祖舊第作洞真宮成甲戌李繼遷遣使以良馬索駝來貢二月甲申命宰相禱雨令川峽諸州瘞暴骸戊戌以旱慮囚減流罪以下丙午兩嘉州函賊帥張餘首送西川行營餘黨悉平蠲襄唐均汝隨鄧歸峽等州去年逋租振亳州房州光化軍饑遣使貸之三月庚申詔求直言辛酉以會州觀察使知清遠軍田紹斌為靈州兵馬都部署己巳廢邵武軍歸化縣金坑夏四月癸未

吏部尚書平章事呂蒙正罷為右僕射以參知政事  
呂端為戶部侍郎平章事宣徽北院使知樞密院事  
柴禹錫罷為鎮寧軍節度使參知政事蘇易簡為禮  
部侍郎以翰林學士張洎為給事中參知政事甲申  
以宣徽北院使同知樞密院事趙鎔知樞密院事乙  
酉契丹犯雄州知州何承矩擊敗之斬其鐵林大將  
一人辛丑遣使分決諸路刑獄劫賊止誅首惡降流  
罪以下一等壬寅慮囚甲辰大雨雷電開寶皇后宋  
氏崩六月乙酉購求圖書丙戌遣使諭李繼遷授以  
鄜州節度使繼遷不奉詔丁亥以銀州左都押衙張

浦為銀青光祿大夫檢校工部尚書鄭州刺史兼御史大夫充本州團練使己亥許士庶工商服紫是月大熱民有暍死者秋七月丙寅除陳許等九州及光化軍今年夏稅八月壬辰詔立壽王元侃為皇太子改名恒兼判開封府大赦文武常參官子為父後見任官者賜勲一轉癸巳以尚書左丞李至禮部侍郎李沆並兼太子賓客癸卯禁西北緣邊諸州民與內屬戎人昏娶九月丙午西南蕃牂牁諸蠻來貢詔封西南蕃主龍漢瑋為歸化王丁卯御朝元殿冊皇太子庚午清遠軍言李繼遷入寇率兵擊走之冬十月



甲戌朔皇太子讓宮僚稱臣許之乙丑陝西轉運使鄭文寶坐撓邊責授藍山縣令十一月己未閱武便殿是月以峯州團練使上官正右諫議大夫雷有終並為西川招安使召王繼恩歸闕十二月甲戌群臣奉表加上尊號曰法天崇道上聖至仁皇帝凡五上不許契丹犯邊折御卿率兵禦之卒于師斬馬步軍都軍頭孫贊于軍中庚辰新渾儀成

二年春正月辛亥祀天地于圜丘大赦中外文武加恩丁卯廢諸州司理判官二月壬申朔司空致仕李昉薨戊寅以越王元份為杭州大都督兼領越州吳

王元傑為揚州大都督兼領壽州己卯以徐國公元  
俛為洪州都督鎮南軍節度使涇國公元僞為鄂州  
都督武清軍節度使庚辰以御史中丞李昌齡為給  
事中參知政事辛巳以呂蒙正為左僕射宋琪為右  
僕射乙未定任子官制三月丙寅以京師旱遣中使  
禱雨戊辰命宰臣祀郊廟社稷禱雨夏四月甲戌命  
侍衛馬軍都指揮使李繼隆為環慶等州都部署殿  
前都虞候范廷召副之討李繼遷癸未雨五月癸卯  
李繼遷寇靈州六月戊戌黔州言蠻寇鹽井巡檢使  
王惟節戰死是月亳州蝗秋七月己亥朔命殿前都

指揮使王超為夏綏麟府州都部署庚子詔作壽寧  
觀成丙寅給事中參知政事寇準罷守本官戊辰蠲  
峽路諸州民去年逋租是月汴水決穀熟縣許宿齊  
三州蝗抱草死閏月庚寅詔江浙福建民負人錢沒  
入男女者還其家敢匿者有罪八月辛丑密州言蝗  
不為災九月戊寅右僕射宋琪薨詔川峽諸州民家  
先藏兵器者限百日悉送官匿不以聞者斬己卯夏  
州延州行營言破李繼遷於烏白池獲未募軍主吃  
囉指揮使等二十七人繼遷遁甲申會州觀察使環  
慶副都部署田紹斌貶右監門衛率府副率虢州安

置丙戌秦晉諸州地晝夜十二震丙申詔廢衢州治  
冬十月己未詔以池州新鑄錢監為永豐監十一月  
丁卯朔增司天新曆為一百二十甲子戊寅置簽署  
提點樞密宣徽院諸房公事辛卯許州群盜劫郢城  
縣居民巡檢李昌習闕死都巡檢使王正襲擊之獲  
賊首宋斌及餘黨皆斬于市甲午禁淮南通行鹽稅  
十二月命宰相以下百官詣諸寺觀禱雪甲寅雨雪  
大有年是歲處州稻再熟

三年春正月丙子以戶部侍郎溫仲舒禮部侍郎王  
化基並參知政事給事中李惟清同知樞密院事參

知政事張洎罷為刑部侍郎乙酉孝章皇后陪葬永昌陵辛卯以侍衛馬步軍都虞候傅潛為延州路都部署殿前都虞候王昭遠為靈州路都部署二月丙申朔靈州行營破李繼遷辛丑帝不豫甲辰降京畿死罪囚流以下釋之壬戌大食賓同隴國並來貢三月丁卯占城國來貢壬辰不視朝癸巳追班于萬歲殿宣詔令皇太子柩前即位是日崩年五十九在位二十二年殯于殿之西階群臣上尊謚曰神功聖德文武皇帝廟號太宗十月己酉葬永熙陵

贊曰帝沈謀英斷慨然有削平天下之志既即大位

陳洪進錢俶相繼納土未幾取太原伐契丹繼有交  
州西夏之役干戈不息天災方行俘馘日至而民不  
知兵水旱螟蝗殆徧天下而民不思亂其故何也帝  
以慤儉為寶服澣濯之衣毀奇巧之器却女樂之獻  
悟畋遊之非絕遠物抑符瑞閑農事考治功講學以  
求多聞不罪狂悖以勸諫士哀矜惻怛勤以自勵日  
晏忘食至於欲自焚以荅天譴欲盡除天下之賦以  
紓民力卒有五兵不試禾稼荐登之效是以青齊耆  
耄之叟願率子弟治道請登禪者接踵而至君子曰  
得乎丘民而為天子帝之謂乎故帝之功德炳煥史

牒號稱賢君若夫太祖之崩不踰年而改元涪陵縣  
公之貶死武功王之自殺宋后之不成喪則後世不  
能無議焉

本紀卷第五